




水經注釋

卷三十七之三十九



水經注釋卷三十七

仁和趙一清誠夫錄

淹水

葉榆水

夷水

油水

澧水

沅水

浪水

淹水出越嶲遂久縣徼外

呂忱曰淹水一曰復水也

東南至蜻蛉縣

縣有禺同山其山神有金馬碧雞光景儵忽民多見之
漢宣帝遣諫大夫王褒祭之欲致其雞馬褒道病而卒
是不果焉王褒碧雞頌曰敬移金精神馬縹碧之雞故

左太冲蜀都賦曰金馬騁光而絕影碧雞儵忽而耀儀
又東過姑復縣南東入于若水

淹水逕縣之臨池澤

全氏曰漢志越嶲郡姑復縣臨池澤在南又青蛉縣臨池澤在北澤

之與濼不知何以分也一清按濼即澤也二縣地界以此而分方輿紀要姑復廢縣在四川會川衛南沈約志雲南有東西二古復縣即漢姑復縣

青蛉廢縣在雲南姚州大姚縣北

而東北逕雲南縣

步名馮河

益州葉榆河出其縣北界屈從縣東北流

縣故滇池葉榆之國也漢武帝元封二年使唐蒙開之

以為益州郡郡有葉榆縣縣西北十里有弔鳥山衆鳥

千百為羣共會鳴呼啁嘶每歲七八月至集六七日則

止一歲六至雉雀來弔夜然火而取之其無噉不食似

特悲者以為義鳥則不取也俗言鳳凰死于此山故衆

鳥來弔因名曰弔鳥縣之東有葉榆澤葉榆水所鍾而

為此川藪也

禹貢錐指曰蔡傳述程大昌之論曰樊綽以麗水為黑水恐其狹小不足為界其所

稱西洱河者却與漢志葉榆澤相貫廣處可二十里既足以界別二州其流又正趨南海又漢滇池即葉榆之

地武帝初開滇嶺時其地古有黑水祠夷人不知載籍必不能附會而綽及道元皆謂此澤以榆葉所漬得名

則其水之黑似榆葉積漬所成且其地乃蜀之正西又東北距宕昌不遠宕昌即三苗種裔與三苗之叙于三

危者又為相應莫此之明也而傳同叔非之杏溪之識遠過九峰矣葉榆本蠻語與中國文義不同安知為榆

樹之葉澤以榆葉所漬得名檢酈注無此言蓋亦出樊綽韓汝節云此說尤不通源之黑或由榆葉所漬若流

去數千里其色尚不變有是理乎且他處黑水甚多未聞皆有樹葉落其下也宕昌國唐為宕州地州南至扶州四百一十里北至岷州二百五十里蓋古梁州之北界而程氏云葉榆河在蜀之正西東北距宕昌不遠計宕昌西南距大理凡三千餘里而猶謂之不遠豈生不見圖籍乎且葉榆縣在益州郡西七百餘里縣東有葉榆澤其下流雖逕滇池縣南而未嘗有黑水之稱安得謂其所祠即黑水之源哉一清按葉榆范史滇王哀牢傳俱作楛榆章懷注云楛或作蝶則此水果非因榆葉所漬致黑足以折九峯之妄而杜樊生之口矣樊綽唐咸通中為安南都護蔡襲從事著蠻書十卷見唐書藝文志

過不韋縣

縣故九隆哀牢之國也有牢山其先有婦人名沙臺朱氏

謀埠箋曰後漢書作沙壹居于牢山捕魚水中觸沈木若有感因懷

孕產十子後沈木化為龍出水九子驚走小子不能去

背龍而坐龍因控朱氏謀埠箋曰後漢書作舐之其母鳥語謂背為

九謂坐為隆因名為九隆及長諸兄遂相共推九隆為

王後牢山下有一夫一婦生十女九隆皆以為妻遂因

孳育皆畫身像龍文衣皆著尾九隆死世世不與中國

通漢建武二十三年王遣兵乘箄船南下水攻漢鹿芩

民鹿芩民弱小將為所擒于是天大震雷疾雨南風漂

起水為逆流波湧二百餘里箄船沈沒溺死數千人後

數年復遣六王將萬許人攻鹿芩鹿芩王與戰殺六王

哀牢耆老共埋之其夜虎掘而食之明旦但見骸骨驚

怖引去乃懼耆老謂其小王曰哀牢犯徼自古有之今

此攻鹿麥輒被天誅中國有受命之王乎何天祐之明也即遣使道越巂奏獻求乞內附長保塞徼漢明帝永平十二年置為永昌郡郡治不韋縣蓋秦始皇徙呂不韋子孫于此故以不韋名縣沈氏曰常璩云武帝置不韋縣徙南越相呂嘉宗族于此因名不韋以章其先人之惡非秦徙也北去葉榆六百里葉榆水不逕其縣自不韋北注者盧倉禁水耳葉榆水自縣南逕遂久縣東又逕姑復縣西與淹水合又東南逕永昌邪龍縣縣以建興三年劉禪分隸雲南于不韋縣為東北

東南出益州界

葉榆水自邪龍縣東南逕秦藏縣南與僕水同注滇池

澤於連然雙柏縣也葉榆水自澤又東北流逕滇池縣南又東逕同並縣南又東逕漏江縣伏流山下復出蝮口謂之漏江左思蜀都賦曰漏江汎流潰其阿汨若湯谷之揚濤沛若濛汜之湧波諸葛亮之平南中也戰于是水之南葉榆水又逕賁古縣北東與盤江合盤水出律高縣東南監町山一清按漢志注師古曰監音呼鴉反町音挺東逕梁水

郡北賁古縣南水廣百餘步深處十丈甚有瘴氣朱哀之反李恢追至盤江者也建武十九年伏波將軍馬援上言從麋泠出賁古擊益州臣所將越駱萬餘人便習戰鬪者二千兵以上弦毒矢利以數發矢注如雨所中

輒死愚以行兵此道最便蓋承藉水利用為神捷也盤水又東逕漢興縣山溪之中多生邛竹桄榔樹樹出麪而夷人資以自給故蜀都賦曰邛竹緣嶺又曰麪有桄榔盤水北入葉榆水諸葛亮入南中戰於盤東是也入牂柯郡西隨縣北為西隨水又東出進桑關

進桑縣牂柯之南部都尉治也水上有關故曰進桑關也故馬援言從麋泠水道出進桑王國至益州賁古縣轉輸通利益兵車資運所由矣全氏曰漢志牂柯郡西至麋泠入尚龍谿過郡二行千一百六里都夢縣壺水東南至麋泠入尚龍谿過郡二行千一百六里益州來唯縣勞水出徼外東至麋泠入南海過郡二行三千五百六十里是皆所云麋泠水道也而壺水獨無聞

自西隨至交阯崇山接險水路三千里葉榆水又東南絕温水而東南注于交阯

過交阯麋泠縣北分為五水絡交阯郡中至東界復合為三水東入海

尚書大傳曰堯南撫交阯于禹貢荊州之南垂幽荒之外故越也周禮南八蠻雕題交阯有不粒食者焉春秋不見于傳不通于華夏在海島人民鳥語秦始皇開越嶺南立蒼梧南海交阯象郡漢武帝元鼎二年始并百越啟七郡于是乃置交阯刺史以督領之初治廣信所以獨不稱州時又建朔方郡已始開北垂遂辟交阯於

南為子孫基阯也

一清按後漢書章懷注引輿地志云其夷足大指開折兩足並立趾則相

交趾與阯同古字通用然則非因武帝置郡而有子孫基阯之說也此蓋襲應劭漢官儀之文 麋泠縣

漢武帝元鼎六年開都尉治交州外域記曰越王令二使

者典主交阯九真二郡民後漢遣伏波將軍路博德討

越王路將軍到合浦越王令二使者齎牛百頭酒千鍾

及二郡民戶口簿詣路將軍乃拜二使者為交阯九真

太守主諸維將主民如故

全氏曰按交阯長稱西于王見漢書功臣表左將黃同斬

之不稱越亦非迎降者晉書地道記謂南越侯織封羸樓侯亦非也

交阯郡及州本治於

此也州名為交州後朱載維將子名詩索麋泠維將女

名徵側為妻

一清按索妻猶言娶婦范史南蠻西南夷傳云嫁為朱鸞人詩索妻亦繆之甚矣

側為人有膽勇將詩起賊攻破州郡服諸維將皆屬徵

側為王治麋泠縣得交阯九真二郡民二歲調賦後漢

遣伏波將軍馬援將兵討側詩走入金溪究

全氏曰按金谿范史

作禁谿章懷注引越志作金溪穴一清按穴乃究字之誤

三歲乃得爾時西蜀並遣

兵共討側等悉定郡縣為令長也山多大蛇名曰髯虵

長十丈圍七八尺常在樹上伺鹿獸鹿獸過便低頭繞

之有頃鹿死先濡令溼訖便吞頭角骨皆鑽皮出山夷

始見蛇不動時便以大竹籤籤蛇頭至尾殺而食之以

為珍異故楊氏南裔異物志

一清按隋書經籍志交州異物志一卷楊孚撰曰

髯惟大蛇既洪且長采色駁犖其文錦章食豕吞鹿腴

成養劓賓享嘉宴是豆是觴言其養劓之時肪腴甚肥
 搏之以婦人衣投之則蟠而不起走便可得也此二水
 左水東北逕望海縣南建武十九年馬援征徵側置又
 東逕龍淵縣北又東合南水自麋泠縣東逕封溪縣北
 交州外域記曰交阯昔未有郡縣之時土地有雒田其
 田從潮水上下民墾食其田因名為雒民設雒王雒侯
 主諸郡縣縣多為雒將雒將銅印青綬後蜀王子將兵
 三萬來討雒王雒侯服諸雒將蜀王子因稱為安陽王
 後南越王尉他舉眾攻安陽王安陽王有神人名臯通
 下輔佐為安陽王治神弩一張一發殺三百人南越王

知不可戰却軍住武寧縣按晉太康記縣屬交阯全氏曰九

字注南越遣太子名始降服安陽王稱臣事之安陽王

不知通神人遇之無道通便去語王曰能持此弩王天

下不能持此弩者亡天下通去安陽王有女名曰媚珠

見始端正珠與始交通始問珠令取父弩視之始見弩

便盜以鋸截弩訖便逃歸報南越王南越進兵攻之安

陽王發弩弩折遂敗安陽王下船逕出于海今平道縣

後王宮城見有故處晉太康地記縣屬交阯全氏曰九

南越遂服諸雒將馬援以西南治遠路逕千里分置斯

縣治城郭穿渠通道溉灌以利其民縣有猩猩獸形若

黃狗又狀貍狔人面頭顏端正善與人言音聲麗妙如
 婦人好女對語交言聞之無不酸楚其肉甘美可以斷
 穀窮年不厭又東逕浪泊馬援以其地高自西里進屯
 此又東逕龍淵縣故城南又東左合北水建安二十三
 年一清按浪水篇注作二十二年立州之始蛟龍蟠編于水南北二津
 故改龍淵以龍編為名也盧循之寇交州也交州刺史
 杜慧度率水步晨出南津以火箭攻之燒其船艦一時
 潰散循亦中矢赴水而死于于是斬之傳首京師慧度以
 斬循勲封龍編侯劉欣期交州記曰龍編縣功曹左飛
 曾化為虎數月還作吏既言其化亦化無不在牛哀易

虎不識厥兄當其革狀安知其譌變哉其水又東逕曲

易縣東流注于浪鬱經言於郡東界復合為三水此其

一也全氏曰當作此其二也二水謂南水北水其次一水謂中水合之為三水其次一水東

逕封谿縣南又西南逕西于縣南又東逕羸樓縣北又

東逕北帶縣南又東逕稽徐縣涇水注之水出龍編縣

高山東南流入稽徐縣注于中水中水又東逕羸樓縣

南交州外域記曰縣本交阯郡治也林邑記曰縣自交

阯南行都官塞浦出焉其水自縣東逕安定縣北帶長

江江中有越王所鑄銅船潮水退時人有見之者其水

又東流隔水有泥黎城言阿育王所築也又東南合南水

南水又東北逕九德郡北交州外域記曰交阯郡界有扶巖究在郡之北隔渡一江卽是水也江北對交阯朱戴縣又東逕浦陽縣北又東逕無切縣北建武十九年九月馬援上言臣謹與交阯精兵萬二千人與大兵合二萬人船車大小二千艘自入交阯于今爲盛十月援南入九真至無切縣賊渠降進入餘發渠帥朱伯棄郡亡入深林巨藪犀象所聚羣牛數千頭時見象數十百爲羣援又分兵入無編縣王莽之九真亭全氏曰六至字注中注居風縣帥不降並斬級數十百九真乃靖其水又東逕句漏縣縣帶江水江水對安定縣林邑記所謂外越安

定紀粟者也江中有潛水牛形似水牛上岸鬪角軟還入江水角堅復出又東與北水合又東注鬱亂流而逝矣此其三也平撮通稱同歸鬱海故經有入海之文矣夷水出巴郡魚復縣江

夷水卽佷山清江也水色清照十丈分沙蜀人見其澄

清因名清江也

一清按應劭曰夷山在夷陵西南又云夷水出巫東入江然夷水之源最遠方

輿紀要云源出蠻中南流名柘林溪經天池洛浦名黔黎溪南至金洞唐崖入黔江縣名黔江又云黔江自貴州思州之上費溪發源經五十八節名灘至黔州境分流入黔江縣界爲施州江入湖廣施州衛謂之清江是也水源之遠如此是以善長不記其所出而以佷山清江爲限至應劭所云夷山似因夷水得名大類常璩漾山漾水之殊目不足爲據江水篇經云江水又東南過夷道縣北夷水從佷山縣南東北注之注云夷道縣爲

二江之會。是夷水出江入江而胡朏明云禹循江而南且東以至於巫山乃不出三峽而並夷水以東且南逾澧水沅水以至於衡山導江云東別為沱又東至于澧則不經三峽可知又云夷水首出魚復江尾入宜都江行五百餘里是亦荆州之沱也古時自巴入楚避三峽之險皆由此路史記張儀說楚王曰秦西有巴蜀大船積粟起于汶山浮江以下至楚三千餘里舫船載卒一日行三百餘里不至十日而拒扞關扞關驚則從境以東盡城守矣黔中巫郡非王之有此言舟師自夷水以入楚也楚世家肅王四年蜀伐楚取茲方于是楚為扞關以拒之水經注江水自江關東逕弱關捍關蓋大江出三峽逕弱關江沱出佷山逕捍關劃然兩道儀言浮江以下拒扞關則不逕巫峽明矣夷水受江處不知何時日就湮塞後漢建武中公孫述遣將田戎等乘枋箬下江關拔夷道夷陵光武命岑彭吳漢伐之沂江而上則皆取道于三峽而不復由夷水矣蓋其時水已淺狹不勝戰艦自後荆梁用師未有不由峽江者然酈注云河梁裁得通船則後魏時猶存下逮唐初建始之北遂成斷港故章懷注西南夷傳寰宇記明一統志不復知此水出西北奉節之大江而以為西南施州衛之山源

然自漢志已不言首受江未知何故班氏疎略頗多水經注源委詳明而又有張儀之言為證無可疑者禹導江自梁入荆必浮此水也東樵此言較宛溪為覈然則夷水乃跨有荆梁之沱禹貢所記二州指此已備紛紛鄭江玉輪江鄴江枝江皆後起之名耳昔廩君浮土舟於夷水據捍關而王巴是以法孝直有言魚復扞關臨江據水實益州禍福之門夷水又東逕建平沙渠縣縣有巫城南岸臨水山道五百里其水歷縣東出焉

東南過佷山縣南

夷水自沙渠縣入水流淺狹裁得通船東逕難畱城南城即山也獨立峻絕西面上里餘得石穴把火行百許步得二大石積並立穴中相去一丈俗名陰陽石陰石

常溼陽石常燥每水旱不調居民作威儀服飾往入穴中旱則鞭陰石應時雨多雨則鞭陽石俄而天晴相承所說往往有效但捉鞭者不壽人頗惡之故不爲也東北面又有石室可容數百人每亂民入室避賊無可攻理因名難畱城也昔巴蠻有五姓未有君長俱事鬼神乃共擲劍於石穴約能中者奉以爲君巴氏子務相乃中之又令各乘土舟約浮者當以爲君唯務相獨浮因共立之是爲廩君乃乘土舟從夷水下至鹽陽鹽水有神女謂廩君曰此地廣大魚鹽所出願畱共居廩君不許鹽神暮輒來宿旦化爲蟲羣飛蔽日天地晦冥積十

餘日廩君因伺便射殺之天乃開明廩君乘土舟下及夷城夷城石岸嶮曲其水亦曲廩君望之而嘆山崖爲崩廩君登之上有平石方二丈五尺因立城其傍而居之四姓臣之死精魂化而爲白虎故巴氏以虎飲人血遂以人祀鹽水卽夷水也

全氏曰按江水篇夷水出夷谿鹽水出巫溪今此合爲一

又有鹽石卽陽石也盛宏之以是推之疑卽廩君所射鹽神處也將知陰石是對陽石立名矣事旣鴻古難爲明徵夷水又東逕石室在層巖之上石室南向水出其下懸崖千仞自水上逕望見每有陟山嶺者扳木側足而行莫知其誰村人駱都小時到此室邊採蜜見一仙

人坐石牀上見都凝矚不轉都還招村人重往則不復見鄉人今名為仙人室袁山松云都孫息尚存夷水又東與溫泉三水合大溪南北夾岸有溫泉對注夏煖冬熱上常有霧氣瘍疾百病浴者多愈父老傳此泉先出鹽于今水有鹽氣夷水有鹽水之名此亦其一也夷水又東逕佷山縣故城南縣即山名也孟康曰音恒出藥草恒山今世以銀為音也全氏曰孟康曰下舊武陵之十七字注中注屬縣南一里即清江東注矣南對長楊溪溪水西南潛穴穴在射堂村東六七里谷中有石穴清泉瀆流三十許步復入穴即長楊之源也水中有神魚大者二尺小

者一尺居民釣魚先陳所須多少拜而請之拜訖投釣餌得魚過數者水輒波湧暴風卒起樹木摧折水側生異花路人欲摘者皆當先請不得輒取水源東北之風井山迴曲有異勢穴口大如盆袁山松云夏則風出冬則風入春秋分則靜余往觀之其時四月中去穴數丈須臾寒慄言至六月中尤不可當往人有冬過者置笠穴中風吸之經月還步楊溪得其笠則知潛通矣其水重源顯發北流注于夷水此水清冷甚於大溪縱暑伏之辰尚無能澡其津流也縣北十餘里有神穴平居無水時有渴者誠啟請乞輒得水或戲求者水終不出縣

東十許里至平樂村又有石穴出清泉中有潛龍每至大旱平樂村左近村居輦草穢著穴中龍怒須臾水出蕩其草穢傍側之田皆得澆灌從平樂順流五六里東亭村北山甚高峻上合下空空微東西廣二丈許高起如屋中有石牀甚整頓傍生野韭人往乞者神許則風吹別分隨偃而揃不得過越不偃而揃輒凶往觀者去時特平暨處自然恭肅矣

又東過夷道縣北

夷水又東逕虎灘岸石有虎像故因以名灘也夷水又東逕釜瀨其石大者如釜小者如刁斗形色亂真唯實

中耳夷水又東北有水注之其源百里與丹水出西南望州山山形竦峻峰秀甚高東北白巖壁立西南小演通行登其頂平可有三畝許上有故城城中有水登城望見一州之境故名望州山俗語訛今名武鍾山山根東有湧泉成溪卽丹水所發也下注丹水天陰欲雨輒有赤氣故名曰丹水矣丹水又逕亭下有石穴甚深未嘗測其遠近穴中蝙蝠大者如鳥悉多倒懸元中記曰蝙蝠百歲者倒懸得而服之使人神仙穴口有泉冬溫夏冷一清按此處有脫文蓋言泉水有魚故下有秋藏春遊之文秋則入藏春則出遊民至秋闌斷水口得魚大者長四五尺骨軟肉美異

於餘魚丹水又逕其下積而爲淵淵有神龍每旱村人以蔞草投淵上流魚則多死龍怒當時大雨丹水又東北流兩岸石上有虎跡甚多或深或淺皆悉成就自然咸非人工丹水又北注于夷水水色清澈與大溪同夷水又東北逕夷道縣北而東注

東入于江

夷水又逕宜都北東入大江有涇渭之比亦謂之佷山北溪水所經皆石山略無土岸其水虛映俯視遊魚如乘空也淺處多五色石冬夏激素飛清傍多茂木空岫靜夜聽之恒有清響百鳥翔禽哀鳴相和巡頽浪者不

覺疲而忘歸矣

油水出武陵孱陵縣西界

縣有白石山油水所出東逕其縣西與滄水合水出高成縣滄山東逕其縣下東至孱陵縣入油水也

東過其縣北

縣治故城王莽更名孱陸也劉備孫夫人權妹也又更修之其城背油向澤

又東北入于江

油水自孱陵縣之東北逕公安縣西又北流注于大江澧水出武陵充縣西歷山東過其縣南

澧水自縣東逕臨澧零陽二縣故界水之南岸白石雙立厥狀類人高各三十丈周四丈古老傳言昔充縣尉與零陽尉共論封境因相傷害化而為石東標零陽西揭充縣後即其地為臨澧縣之故治臨側澧水即為縣名晉太康四年置澧水又東茹水注之水出龍茹山水色清澈漏石分沙莊辛說楚襄王所謂飲茹溪之流者也茹水東流注入澧水

又東過零陽縣之北

澧水東與溫泉水會水發北山石穴中長三十丈冬夏沸湧常若湯焉溫水南流注于澧水澧水又東合零溪

水源南出零陽之山歷溪北注澧水

一清按漢志武陵郡零陽縣應劭曰

零水所出東入湘殆即零溪也而道元以為入澧

澧水又東九渡水注之水南

出九渡山山下有谿又以九渡為名山獸咸飲此水而

逕越他津皆不飲之九渡水北逕僊人樓下傍有石形

極方峭世名之為仙樓水自下歷溪曲折逶迤傾注行

者閒關每所褰沂山水之號蓋亦因事生焉九渡水又

北流注于澧水澧水又東婁水入焉水源出巴東界東

逕天門郡婁中縣北又東逕零陽縣注于澧水澧水又

東逕零陽縣南郡緣零溪以著稱矣澧水又逕澧陽縣

右會澧水水出建平郡東逕澧陽縣南晉太康中置澧

水又左合黃水水出零陽縣西北連巫山溪出雄黃頗有神異採之常以冬月祭祀鑿石深數丈方得佳黃故溪水取名焉黃水北流注于澧水澧水又東注澧水謂之澧口澧水又東逕澧陽縣南南臨澧水晉太康四年立天門郡治也吳永安六年武陵郡嵩梁山高峯孤竦素壁千尋望之若亭有似香爐其山洞開元朗如門高三百丈廣二百丈門角上各生一竹倒垂下拂謂之天帚孫休以為嘉祥分武陵置天門郡澧水又東歷層步山高秀特立山下有峭澗泉流所發南流注于澧水又東過作唐縣北

作唐縣後漢分孱陵縣置澧水入縣左合涔水水出西

南天門郡界南流逕涔坪屯屯塌涔水溉田數千頃清一

按說文涔陽渚在郢中又東南流注于澧水澧水又東澹水出焉

澧水又南逕故郡城東東轉逕作唐縣南澧水又東逕南安縣南晉太康元年分孱陵立澹水注之水上承澧

水於作唐縣東逕其縣北又東注于澧謂之澹口一清按澹

水三國時亦曰誕水吳書黃蓋傳所謂巴醴由誕者也由即油水誕即澹水也王仲宣贈士孫

文始詩曰悠悠澹澧者也澧水又東與赤沙湖水會湖

水北通江而南注澧謂之沙口澧水又東南注于沅水

曰澧口蓋其枝瀆耳離騷曰沅有芷兮澧有蘭

又東至長沙下雋縣西北東入于江

澧水流注于洞庭湖俗謂之曰澧江口也

沅水出牂柯且蘭縣

一清按漢志續志皆云故且蘭至晉志始去故字宋志云且蘭令漢舊縣

故且蘭是也此條經文與江水篇氏道縣同一例

為旁溝水又東至鐔成縣為沅

水

東逕無陽縣

一清按後漢省無陽故不見于續志晉志作舞陽宋志云太康地志有蓋復立也此

句之首注有脫文朱謀埠箋曰舊本作沅江在沅州府經文非是瑯珠沅州府志云方輿紀要沅江在沅州府西南五里自貴州番界入沅州境又云澧水在州南四里又引熊氏曰今辰州之武溪即古舞水沅州之澧蓋即沅水之異名耳按諸書皆謂澧水即沅水是混澧沅而一之其說均非不可不辨蓋熊氏之以澧水即沅水者由誤以武溪即澧水耳今瀘溪縣志亦祖其說是踵誤也夫無水之名見于水經注武溪之名亦見于水

辰州瀘溪縣西有武山高可萬仞元和郡縣志亦云瀘

水在瀘溪縣西二百五十里即武溪所出是武溪可名

別顧熊氏之為此說或因荆州記五溪有武溪無澧溪

故遂以武溪當澧溪與不知五溪之名出入不一武溪

之不能當澧溪猶澧溪之不能當沅溪也惟見于水經

注者為足据耳至于顧氏之言則又泥解水經注何也

漢書注言無水首受故且蘭又言沅水出牂柯首受與

出既異文則義固自有別是沅與澧本二水也水經言

沅水至鐔成縣為沅水鐔成今黔陽也水經注言無水

南流至無陽故縣無陽故縣今芷江也安得謂無陽即

鐔成耶乃或者疑經文有沅水東逕無陽縣句可以證

沅無總一水之說不知舊本此段經文自沅水出牂柯

云云至東至鐔成縣為沅水句止下云東逕無陽縣五

字則注起語也酈道元北魏人其所謂無陽縣者乃晉

義熙中徙故鐔成之無陽亦即今黔陽已非漢舊故稱

漢之無陽為故縣以別之且下即云無水出故且蘭南

流至無陽故縣者蓋謂沅之上流另有一支之水流入

于沅故注文至謂之無口句下又云沅水東逕無陽縣

前有故字而後無故字則五字之非經文可知自朱鬱儀移作經文且自謂據宋本改正鬱儀號稱博雅其點竄古人無不無穿鑿附會顧氏不細繹經注漫以泝始析流為得解強合為一以誤後人而莫有知其非者尤可怪也無水出故且蘭南流至無陽故縣縣對無水因以氏

縣無水又東南入沅謂之無口一清按漢志無水首受故且蘭南入沅行八百

九十沅水東逕無陽縣南臨運水水源出東南岸許山

西北逕其縣南流注于熊溪熊溪南帶移山一清按浪水篇注無

陽縣有移溪山本在水北夕中風雨旦而山移水南故

山以移為名蓋亦蒼梧郁州東武怪山之類也熊溪下

注沅水沅水又東逕辰陽縣縣有龍溪水南出于龍嶠

之山北流入于沅沅水又東溢水注之南出扶陽之山

北流會于沅沅水又東與序溪合水出武陵郡義陵縣

鄜梁山西北流逕義陵縣王莽之建平縣也治序溪其

城劉備之秭歸馬良出五溪綏撫蠻夷良率諸蠻所築

也一清按義陵縣後漢廢蜀志先主傳軍次秭歸武陵

五溪蠻夷遣使請兵將軍吳班陳式水軍屯夷陵夾

江東西岸先主自秭歸率諸將進軍緣山絕嶺于夷道

獠亭駐營自恨山通道武陵遣侍中馬良安撫五谿蠻

夷咸相響應良所築城即所治序溪最為沃壤良田數

百頃特宜稻修作無廢又西北入于沅一清按漢志武

陵郡義陵縣鄜梁山序水所出西入沅沅水又東合柱水水導源柱溪北流注沅

一清按序水方輿紀要作激水引舊志云今激浦縣南

通用沅水又東逕辰陽縣南東合辰水水出縣三山谷
一清按漢志武陵郡辰陽縣三山谷辰水所出南入沅行七百五十里東南流合獨母水

水源南出龍門山歷獨母溪北入辰水辰水又逕其縣北舊治在辰水之陽故即名焉楚辭所謂夕宿辰陽者也王莽更名會亭矣辰水又右會沅水名之爲辰溪口武陵有五溪謂雄溪楠溪無溪酉溪辰溪其一焉夾溪悉是蠻左所居故謂此蠻爲五溪蠻也沅水又逕沅陵縣西有武溪源出武山與酉陽分山水源石上有盤瓠跡猶存矣盤瓠者高辛氏之畜狗也其毛五色高辛氏患犬戎之暴乃募天下有能得犬戎之將軍吳將軍頭

者妻以少女下令之後盤瓠遂銜吳將軍之首於闕下帝大喜未知所報女聞之以爲信不可違請行乃以配之盤瓠負妻入南山上石室中所處嶮絕人迹不至帝悲思之遣使不得進經二年生六男六女盤瓠死因自相夫妻織績木皮染以草實好五色衣裁置皆有尾其母白帝賜以名山其後滋蔓號曰蠻夷今武陵郡夷即盤瓠之種落也其狗皮毛嫡孫世寶錄之武水南流注于沅沅水又東施水注之水南出施山溪源有陽欺崖崖色純素望同積雪下有二石室先有人處其間細泉輕流望川競注故不可得以言也施水北流會于沅沅

水又東逕沅陵縣北漢故頃侯吳陽之邑也

一清按漢表陽以高

后元

年封王莽改曰沅陸縣北枕沅水沅水又東逕縣故治

北移縣治之舊城置都尉府因岡傍阿勢盡川陸臨沅

對酉二川之交會也酉水導源益州巴郡臨江縣故武

陵之充縣酉原山東南流逕無陽故縣南又東逕遷陵

故縣界與西鄉溪合即延江之枝津更始之下流謂之

西鄉溪口酉水又東逕遷陵縣故城北王莽更名曰遷

陸也酉水東逕酉陽故縣南縣故酉陵也酉水又東逕

沅陵縣北又東南逕潘承明壘西承明討五溪蠻營軍

所築也其城跨山枕谷酉水又南注沅水闕駟謂之受

水其水所決入名曰酉口

一清按漢志武陵郡充縣酉原山西水所出南至沅陵入

沅行千二百里

沅水又逕寶應明城側應明以元嘉初伐蠻所

築也沅水又東溪水南出茗山山深迴嶮人獸阻絕溪

水北瀉沅川沅水又東與諸魚溪水合水北出諸魚山

山與天門郡之澧陽縣分嶺溪水合南流會于沅沅水

又東夷水入焉水南出夷山北流注沅夷山東接壺頭

山

一清按章懷後漢書注引武陵記曰此山與東山高山海方壺山相似神仙多所遊集故名壺頭山也

一百里廣圓三百里山下水際有新息侯馬援征武溪

蠻停軍處壺頭徑曲多險其中紆折千灘援就壺頭希

効早成道遇瘴毒終沒于此忠以獲謫信可悲矣劉澄

之曰沅水自壺頭枝分跨三十三渡逕交阯龍編縣東北入于海脈水尋梁乃非關究但古人許以傳疑聊書所聞耳

又東北過臨沅縣南

臨沅縣與沅南縣分水沅南縣西有夷望山孤竦中流浮嶮四絕昔有蠻民避寇居之故謂之夷望也南有夷望溪水南出重山遠注沅沅水又東得關下山東帶關溪瀉注沅瀆沅水又東歷臨沅縣西為明月池白璧灣灣狀半月清潭鏡澈上則風籟空傳下則泉響不斷行者莫不擁檝嬉遊徘徊愛玩沅水又東歷三石澗鼎足

均峙秀若削成其側茂竹便娟致可翫也又東帶綠蘿

山頽巖臨水懸蘿釣渚漁詠幽谷浮響若鐘

朱氏謀璋箋曰御覽

引水經注云綠蘿蒙羃積巖臨水實釣渚漁詠之勝地其迭響若鐘音信為神仙之所居沅水又東

逕平山西南臨沅水寒松上蔭清泉下注栖託者不能

自絕於其側沅水又東逕臨沅縣南縣南臨沅水因以

為名王莽更之監沅縣也縣南有晉徵士漢壽人龔元

之墓銘太元中車武子立縣治武陵郡下本楚之黔中

郡矣秦昭襄王二十七年使司馬錯以隴蜀軍攻楚楚

割漢北與秦至三十年秦又取楚巫黔及江南地以為

黔中郡漢高祖二年割黔中故治為武陵郡王莽更之

建平郡也南對沅南縣後漢建武中所置也縣在沅水之陰因以沅南為名縣治故城昔馬援討臨鄉所築也沅水又東歷小灣謂之枉渚渚東里許便得枉人山山西帶脩溪一百餘里茂竹便娟披溪蔭渚長川逕引遠注于沅沅水又東入龍陽縣有澹水出漢壽縣西楊山南流東折逕其縣南縣治索城即索縣之故城也漢順帝陽嘉中改從今名闕駟以為興水所出東入沅而是水又東歷諸湖方南注沅亦曰漸水也水所入之處謂之鼎口一清按漢志武陵郡索縣漸水東入沅沅水又東歷龍陽縣之汜洲洲長二十里吳丹楊太守李衡植柑于其上臨死勅

其子曰吾州里有木奴千頭不責衣食歲絹千疋太史公曰江陵千樹橘可當封君此之謂矣吳末衡柑成歲絹千疋今洲上猶有陳根餘枿蓋其遺也全氏曰胡三柑洲非橘洲湘水篇臨湘縣之橘洲乃衡所植也晏公類要曰湘江四洲橘洲其一焉張舜民柳行錄橘洲東對潭州以是知非汎洲也沅水又東逕龍陽縣北城臨側沅水沅水又東合壽溪內通大溪口有木連理根各一岸而陵空交合其水上承諸湖下注沅水

又東至長沙下雋縣西北入于江一清按漢志牂柯郡故且蘭縣沅水東南至益

陽入江資水篇經文與班志合則此條不容有參錯且與澧水篇經文相同惟少一東字耳

沅水下注洞庭湖方會于江

浪水出武陵鍾成縣北界沅水谷

山海經曰禱過之山浪水出焉而南流注于海是也

南至鬱林潭中縣與鄰水合

水出無陽縣縣故鍾成也晉義熙中改從今名俗謂之移溪溪水南歷潭中注于浪水

又東至蒼梧猛陵縣為鬱溪又東至高要縣為大水

鬱水自鬱林之阿林縣東逕猛陵縣

全氏曰按漢志蒼梧郡猛陵縣龍山

合水所出南至布山入海而善長不志

猛陵縣在廣信之西南王莽之猛

陸也浪水於縣左合鬱溪亂流逕廣信縣地理志曰蒼梧郡治武帝元鼎六年開王莽之新廣郡縣曰廣信亭

王氏交廣春秋

一清按虞喜志林云太康八年廣州大中正王範上交廣二州春秋曰元

封五年交州自羸樓縣移治於此建安十六年吳遣臨

淮步騭為交州刺史將武吏四百人之交州道路不通

蒼梧太守長沙吳巨擁眾五千騭有疑于巨先使諭巨

巨迎之于零陵遂得進州巨既納騭而後有悔騭以兵

少恐不存立巨有都督區景勇略與巨同士為用騭惡

之陰使人請巨巨往告景勿詣騭騭請不已景又往乃

於廳事前中庭俱斬以首徇眾即此也鬱水又逕高要

縣晉書地理志曰縣東去郡五百里刺史夏避毒徙縣

水居也縣有鵠奔亭廣信蘇施妻始珠鬼訟于交州刺

史何敞處事與釐亭女鬼同王氏交廣春秋曰步隲殺
 吳巨區景使嚴舟船合兵二萬下取南海蒼梧人衡毅
 錢博宿巨部伍興軍逆隲于蒼梧高要峽口兩軍相逢
 於是遂交戰毅與衆投水死者千有餘人一清按三國志吳書呂岱
 傳云高涼賊帥錢博乞降岱因承制以博爲高涼西部
 都尉方輿紀要高涼山在高州府東北九十里本名高
 梁衡毅錢博拒步隲于高要峽口毅死博與屬亡于高
 梁蓋卽此山是高要峽之戰毅死而博逃其後遂降也
 交廣春秋未得其實

又東至南海番禺縣西分爲二其一南入于海

鬱水分浪南注

其一又東過縣東南入于海

浪水東別逕番禺山海經謂之賁禺者也交州治中合
 浦姚文式問云何以名爲番禺答曰南海郡昔治在今
 州城中與番禺縣連接今入城東南偏有水坑陵城倚
 其上聞此縣人名之爲番山縣名番禺儻謂番山之禺
 也漢書所謂浮牂柯下離津同會番禺蓋乘斯水而入
 越也秦并天下略定楊越置東南一尉西北一候開南
 海以謫徙民至二世時南海尉任囂召龍川令趙他曰
 聞陳勝作亂豪傑叛秦吾欲起兵阻絕新道番禺負嶮
 可以爲國會病綿篤無人與言故召公來告以大謀囂
 卒他行南海尉事則拒關門設守以法誅秦所置吏以

其黨爲守自立爲王高帝定天下使陸賈就立他爲南越王剖符通使至武帝元鼎五年遣伏波將軍路博德等攻南越王五世九十二歲而亡以其地爲南海蒼梧鬱林合浦交阯九真日南也建安中吳遣步騭爲交州騭到南海見土地形勢觀尉他舊治處負山帶海博敞渺目高則桑土下則沃衍林麓鳥獸于何不有海怪魚鼈黿鼉鮮鰐珍怪異物千種萬類不可勝紀他因岡作臺北面朝漢圓基千步直峭百丈頂上三畝複道迴環逶迤曲折朔望升拜名曰朝臺前後刺史郡守遷除新至未嘗不乘車升履於焉逍遙騭登高遠望覩巨海之

浩茫觀原藪之殷阜乃曰斯誠海島膏腴之地宜爲都邑建安二十二年遷州番禺築立城郭綏和百越遂用寧集交州治中姚文式問答云朝臺在州城東北三十里裴淵廣州記曰城北有尉他墓墓後有大岡謂之馬鞍岡秦時占氣者言南方有天子氣始皇發民鑿破此岡地中出血今鑿處猶存以狀取目故岡受厥稱焉王氏交廣春秋曰南越王趙他生有奉制稱藩之節死有祕奧神密之墓他之葬也因山爲墳其壟塋可謂奢大葬積珍玩吳時遣使發掘其墓求索棺柩鑿山破石費日損力卒無所獲他雖奢僭慎終厥身乃令後人不知

其處有似松喬遷景牧豎固無所殘矣鄧德明南康記
 曰昔有盧耽仕州為治中少棲仙術善解雲飛每夕輒
 陵虛歸家曉則還州嘗於元會至朝不及朝列化為白
 鵠至閣前迴翔欲下威儀以石擲之得一隻履耽驚還
 就列內外左右莫不駭異時步隲為廣州意甚惡之便
 以狀列聞遂至誅滅廣州記稱吳平晉滕脩為刺史脩
 鄉人語脩鰓鬚長一赤脩以為虛責其人乃至東海取
 鰓鬚長四赤一清按裴松之三國志注引王氏交廣
 春秋一赤作一丈四赤作一丈四尺速
 送示脩脩始服謝厚為遣其一水南入者鬱川分派逕
 四會入海也其一即川東別逕番禺城下漢書所謂浮

牂柯下離津同會番禺蓋乘斯水而入于越也

一清按漢書以

下與前文複蓋刪削之未盡者

浪水又東逕懷化縣入于海水有鰓魚

裴淵廣州記曰鰓魚長二丈大數圍皮皆鱗物生子子

小隨母覓食驚則還入母腹吳錄地理志曰鰓魚子朝

索食暮入母腹南越志曰暮從臍入旦從口出腹裏兩

洞腸貯水以養子腸容二子兩則四焉其餘又東至龍

川為涅水

全氏曰按師古漢志注引裴氏廣州記曰龍川縣本博羅縣之東鄉也有龍穿地而出即

穴流泉因以為號龍川殆即涅水也

屈北入員水浪水枝津衍注自番禺

東歷增城縣南越志曰縣多鷄鷄鷄山雞也毛色鮮

明五采眩耀利距善鬪世以家雞鬪之則可擒也又逕

博羅縣西界龍川左思所謂目龍川而帶坳者也趙他乘此縣而跨據南越矣員水又東南一千五百里入南海東歷揭陽縣王莽之南海亭而注于海也

水經注釋卷三十七終

水經注釋卷三十八

仁和趙一清誠夫錄

資水

漣水

湘水

灑水

溱水

資水出零陵都梁縣路山

資水出武陵郡無陽縣界唐糺山蓋路山之別名也謂之大谿水東北逕邵陵郡武岡縣南縣分都梁之所置也縣左右二岡對峙重岨齊秀閒可二里舊傳後漢伐五谿蠻蠻保此岡故曰武岡縣即其稱焉大谿逕建興縣南又逕都梁縣南漢武帝元朔五年以封長沙定王

子敬侯遂之邑也縣西有小山山上有渟水既清且淺其中悉生蘭草綠葉紫莖芳風藻川蘭馨馥遠俗謂蘭為都梁山因以為號縣受名焉

東北過夫夷縣

夫水出縣西南零陵縣界少延山東北流逕扶縣南本

零陵之夫夷縣也一清按沈約志云漢舊縣至晉曰夫夷今云扶者疑是避桓溫諱去夷夫

不可為縣名故為扶云漢武帝元朔五年以封長沙定王子敬侯

義之邑也夫水又東注邵陵水謂之邵陵浦口水也

又東北過邵陵縣之北

縣治郡下南臨大溪水逕其北謂之邵陵水魏咸熙二

一清按兩漢志昭陵屬長沙孫吳始改曰邵陵此亦經文晚出之證

年吳寶鼎元年

全氏曰五字注中注一清按魏祚終於咸熙二年乃孫皓甘露元年明年改元

寶鼎實晉武帝泰始二年也

孫皓分零陵北部立邵陵郡於邵陵縣

縣故昭陵也

一清按史記建元以來王子侯表武帝元朔四年封長沙定王子童為洛陵侯索隱

曰表作路陵在南陽夫長沙之子何以封於南陽括地志云即昭陵是也酈氏疑之故不著洛陵漢表作洛陽

今湖南寶慶府東北五里有洛陽山蓋以侯封得名即前漢之昭陵縣屬長沙國後漢析置昭陽縣晉諱昭改

日邵陵邵陽云爾

谿水東得高平水口水出武陵郡沅陵縣首

望山西南流逕高平縣南又東入邵陵縣界南入於邵

水邵水又東會雲泉水水出零陵永昌縣雲泉山西北

流逕邵陽縣南縣故昭陽也雲泉水又北注邵陵水謂

之邵陽水口自下東北出益陽縣其間逕流山峽名之

爲茱萸江蓋水變名也

又東北過益陽縣北

縣有關羽瀨所謂關侯灘也南對甘寧故壘昔關羽屯軍水北孫權令魯肅甘寧拒之於是水寧謂肅曰羽聞吾咳唾之聲不敢渡也渡則成擒矣羽夜聞寧處分曰興霸聲也遂不渡茱萸江又東逕益陽縣北又謂之資水應劭曰縣在益水之陽今無益水亦或資水之殊目矣然此縣之左右處處有深潭漁者咸輕舟委浪謠詠相和羅君章所謂其聲綿邈者也水南十里有井數百口淺者四五赤或三五丈深者亦不測其深古老相傳

昔人以杖撞地輒便成井或云古人采金沙處莫詳其實也

又東與沅水合於湖中東北入於江也

湖卽洞庭湖也所入之處謂之益陽江口

漣水出漣道縣西

資水之別水出邵陵縣界南逕漣道縣縣故城在湘鄉縣西一百六十里控引衆流合成一谿東入衡陽湘鄉縣歷石魚山下多元石山高八十餘丈廣十里石色黑而理若雲母開發一重輒有魚形鱗鬣首尾宛若刻畫長數寸魚形備足燒之作魚膏腥因以名之漣水又逕

湘鄉縣南臨漣水本屬零陵長沙定王子昌邑一清按漢表哀

帝建平四年封長沙王子昌為湘鄉侯無定字又長沙定王傳元帝初元三年復立旦弟宗是日孝王五年薨

子魯人嗣王莽時絕哀平之世王乃魯人也昌是魯人之子諸侯王表魯人以元帝永光二年嗣四十八年薨

諡曰繆漣水又屈逕其縣東而入湘南縣也

東北過湘南縣南又東北至臨湘縣西南東入於湘

漣水自湘南縣東流至衡陽湘西縣界入於湘水也於

臨湘縣為西南者矣

湘水出零陵始安縣陽海山

即陽朔山也應劭曰湘出零山蓋山之殊名也山在始

安縣北縣故零陵之南部也魏咸熙二年孫皓之甘露

元年全氏曰七字注中注立始安郡湘灘同源分為二水南為灘

水北則湘川一清按善長此言非是詳見灘水篇東北流羅君章湘中記

曰湘水之出於陽朔則觴為之舟至洞庭日月若出入

於其中也

東北過零陵縣東

越城嶠水南出越城之嶠嶠即五嶺之西嶺也秦置五

嶺之戍是其一焉北至零陵縣下注湘水湘水又逕零

陵縣南又東北逕觀陽縣與觀水合水出臨賀郡之謝

沐縣界西北逕觀陽縣西縣蓋即水為名也又西北流

注於湘川謂之觀口也

又東北過洮陽縣東

一清按漢志注如淳曰洮音韜

洮水出縣西南大山東北逕其縣南即洮水以立稱矣

漢武帝元朔五年封長沙定王子靖侯狗彘

朱氏謀瑋箋曰按索

隱曰表作將燕一清按今本漢書將字作狩

為侯國王莽更名之曰洮治也

其水東流注於湘水

又東北過泉陵縣西

營水出營陽冷道縣南畱山

沈氏曰當作營山

西流逕九疑山

下磐基蒼梧之野峯秀數郡之間羅巖九舉各導一谿

岫壑負岨異嶺同勢遊者疑焉故曰九疑山大舜窆其

陽商均葬其陰

全氏曰按胡三省曰太史公云舜南狩崩於蒼梧歸葬於江南九疑則蒼梧九

疑兩地也合而言之者誤也

山南有舜廟前有石碑文字缺落不可

復識自廟仰山極高直上可百餘里古老相傳言未有

登其峯者山之東北冷道縣界又有舜廟縣南有舜碑

碑是零陵太守徐儉立營水又西逕營道縣馮水注之

水出臨賀郡馮乘縣東北馮岡其水導源馮谿西北流

谿以託名焉馮水帶約衆流渾成一川謂之北渚歷縣

北西至關下關下地名也是商舟改裝之始馮水又左

合萌渚之水水南出於萌渚之嶠五嶺之第四嶺也其

山多錫亦謂之錫方矣渚水北逕馮乘縣西而北注馮

水馮水又逕營道縣而右會營水營水又西北屈而逕

營道縣西王莽之九疑亭也營水又東北逕營浦縣南
 營陽郡治也魏咸熙二年吳孫皓分零陵置在營水之
 陽故以名郡矣營水又北都谿水注之水出春陵縣北
 二十里仰山南逕其縣西縣本冷道縣之春陵鄉蓋因
 春谿為名矣漢長沙定王分以為縣武帝元朔五年封
 王中子買為春陵節侯縣故城東又有一城東西相對
 各方百步古老相傳言漢家舊城漢稱猶存知是節侯
 故邑也城東角有一碑文字缺落不可復識東南三十
 里尚有節侯廟都谿水又南逕新寧縣東縣東傍都谿
 谿水又西逕縣南左與五谿俱會縣有五山山有一谿

五水會於谿門

朱氏謀埤箋曰初學記引此注作會於縣門

故曰都谿也都

谿水自縣又西北流逕冷道縣北與冷水合水南出九

疑山

一清按應劭以此冷水為出丹陽宛陵縣西北入江而臣瓚非之師古曰瓚說是冷水見說文即漢志宛陵縣下之清水今謂之清弋江

豈可以冷谿目之乎仲瑗誠誤矣

北流逕其縣西南

縣指冷谿以即名王莽之冷陵縣也冷水又北流注於

都谿水又西北入於營水營水又北流注於營陽峽又

北至觀陽縣而出於峽矣大小二峽之間為浴沂之極

艱矣營水又西北逕泉陵縣西漢武帝元朔五年以封

長沙定王子節侯賢之邑也王莽名之曰溥潤零陵郡

治故楚矣漢武帝元鼎六年分桂陽置太史公曰舜葬

九疑實惟零陵或作零郡

全氏曰四郡取名焉王莽之字注中注

郡取名焉王莽之

九疑郡也下邳陳球為零陵太守桂陽賊胡蘭攻零陵

激流灌城球輒於內因地勢反決水淹賊相拒不能下

縣有白土鄉零陵先賢傳曰鄭產字景載泉陵人也為

白土嗇夫漢末多事國用不足產子一歲輒出口錢民

多不舉子產乃敕民勿得殺子口錢當自代出產言其

郡縣為表上言錢得除更名白土為更生鄉也晉書地

道志曰縣有香茅氣甚芬香言貢之以縮酒也營水又

北流注於湘水湘水又東北與應水合水出邵陵縣歷

山崖澄嶮咀峻嶠萬尋澄淵湛於下應水湧於上東南

流逕應陽縣南晉分觀陽縣立蓋即應水為名也應水

又東南流逕有鼻墟南王隱曰應陽縣本泉陵之北部

東五里有鼻墟言象所封也山下有象廟言甚有靈能

興雲雨余所聞也聖人之神曰靈賢人之精氣為鬼象

生不惠死靈何寄乎應水又東南流而注於湘水湘水

又東北得沘口水出永昌縣北羅山東南流逕石鷲山

東其山有石紺而狀鷲因以名山其石或大或小若母

子焉及其雷風相薄則石鷲羣飛頡頏如真鷲矣羅君

章云今燕不必復飛也其水又東南逕永昌縣南又東

流注於湘水又東北逕祁陽縣南又有餘溪水注之水

出西北邵陵郡邵陵縣東南流注於湘其水揚清汎濁
 水色兩分湘水又北與宜谿水合水出湘東郡之新寧
 縣西南新平故縣東新寧故新平也衆川瀉浪共成一
 津西北流東岸山下有龍穴宜水逕其下天旱則擁水
 注之便有雨降宜水又西北注於湘湘水又西北得春
 水口水上承營陽春陵縣西北潭山一清按此是吳復
立之春陵縣晉志
曰春陽屬零陵郡宋志
曰春陵令屬營陽太守又北逕新寧縣東又西北流注
 於湘水也一清按漢志桂陽郡耒陽縣春山春水所
出北至鄱入湖過郡二行七百八十里
 又東北過重安縣東又東北過鄱縣西承水從東南來注
 之

承水出衡陽重安縣西邵陵縣界邪薑山東北流至重
 安縣逕舜廟下廟在承水之陰又東合略塘相傳云此
 塘中有銅神今猶時聞銅聲於水水輒變淥作銅腥魚
 爲之死一清按名勝志引此注作飛養魚經曰魚滿三
百六十則龍爲之長而引飛出水內鼈則魚不
復去則魚飛承水又東北逕重安縣南漢長沙頃王子
誠亦有之

度邑也故零陵之鍾武縣王莽更名曰鍾桓也武水入
 焉水出鍾武縣西南表山東流至鍾武縣故城南而東
 北流至重安縣注於承水一清按下有缺文至湘東臨承縣北
 東注於湘謂之承口臨承即故鄱縣也縣即湘東郡治
 也郡舊治在湘水東故以名郡魏正元二年吳主孫亮

分長沙東部立縣有石鼓高六赤湘水所逕鼓鳴則土
 有兵革之事羅君章云扣之聲聞數十里此鼓今無復
 聲觀陽縣東有裴巖其下有石鼓形如覆船扣之清響
 遠徹其類也湘水又北歷印石石在衡山縣南湘水右
 側有磐石或大或小臨水石悉有跡其方如印纍然行
 列無文字如此可二里許因名為印石也湘水又北逕

衡山縣東山在西南有三峰一名紫蓋一名容峰

一清按胡

渭曰此處有脫誤盛宏之荊州記云衡山有三峰
 一名紫蓋一名石困一名芙蓉注少石困一句

容峰

最為竦傑自遠望之蒼蒼隱天故羅含云望若陣雲非
 清霽素朝不見其峰丹水湧其左澧泉流其右山經謂

之岫嶮山為南嶽也山下有舜廟南有祝融冢楚靈王
 之世山崩毀其墳得營邱九頭圖禹治洪水用白馬祭
 山得金簡玉字之書容峰之東有仙人石室學者經過
 往往聞諷誦之音矣衡山東南二面臨映湘川自長沙
 至此沿湘七百里中有九向九背故漁者歌曰帆隨湘
 轉望衡九面山上有飛泉下注下映青林直注山下望
 之若幅練在山矣湘水又東北逕湘南縣東又歷湘西
 縣南分湘南置也衡陽郡治魏正元二年吳孫亮分長

沙西部立治湘南

一清按魏正元二年吳五鳳二年也
 吳書孫亮傳郡以太平二年置則魏

甘露二
 年也

晉太守何承天徙治湘西矣十三州志曰日華

水出桂陽郴縣日華山西至湘南縣入湘地理志曰郴縣有耒水出耒山西至湘南入湘湘水又北逕麓山東其山東臨湘川西傍原陞息心之士多所萃焉

又東北過陰山縣西沘水從東南來注之又北過澧陵縣西澧水從東南來注之

續漢書五行志曰建安八年長沙醴陵縣有大山常鳴

如牛响聲積數年後豫章賊攻沒縣亭殺掠吏民因以

為候湘水又北逕建寧縣西傍湘水縣北有空冷峽清一

按方輿記要引此文作空靈峽張舜民郴行錄同寰宇記作空船峽驚浪雷奔濬同三峽

湘水又北逕建寧縣故城下晉太始中立

又北過臨湘縣西瀏水從縣西北流注之

縣南有石潭山湘水逕其西山有石室石牀臨對清流

湘水又北逕昭山西山下有旋泉深不可測故言昭潭

無底也亦謂之曰湘州潭湘水又北逕南津城西西對

橘洲全氏曰此即胡三省所指之橘洲或作吉字全氏曰四字注中注何氏曰周子充云橘

訣律切吉激質切本作兩音北人混而一之故酈道元水經注云橘洲或作吉字一清按吳音亦呼為吉子不

惟北也為南津洲尾水西有橘洲子戍故郭尚存湘水又

北左會五官水口湘浦也又逕船官西湘州商舟之所

次也北對長沙郡郡在水東州城南舊治在城中後乃

移此湘水左逕麓山東上有故城山北有白露水口湘

浦也又右逕臨湘縣故城西縣治湘水濱臨川側故卽名焉王莽改號撫陸故楚南境之地也秦滅楚立長沙

郡卽青陽之地也秦始皇二十六年荆王獻青陽以西

全氏曰按此乃二十六年詔漢書鄒陽傳越水長沙還書中語其時荆亡已三年矣

舟青陽注張晏曰青陽地名也蘇林曰青陽長沙縣也

漢高祖五年以封吳芮爲長沙王是城卽芮築也漢景

帝二年封唐姬子發爲王都此王莽之鎮蠻郡也於禹

貢則荆州之域晉懷帝以永嘉元年分荆州湘中諸郡

立湘州治此城之內郡解西有陶侃廟云舊是賈誼宅

地中有一井是誼所鑿極小而深上斂下大其狀似壺

傍有一腳石牀纔容一人坐形流俗相承云誼宿所坐

牀又有大柑樹亦云誼所植也城之西北有故市北對

臨湘縣之新治縣治西北有北津城縣北有吳芮冢廣

踰六十八丈登臨寫目爲廛郭之佳憩也郭頌世語云

魏黃初末吳人發芮冢取木於縣立孫堅廟見芮尸容

貌衣服竝如故吳平後豫發冢人於壽春見南蠻校尉

吳綱曰君形貌何類長沙王吳芮乎但君微短耳綱瞿

然曰是先祖也自芮卒至冢發四百年至見綱又四十

餘年矣湘水左合誓口又北得石榔口竝湘浦也右合

麻溪水口湘浦也湘水又北逕三石山東山枕側湘川

北卽三石水口也湘浦也水北有三石戍戍城爲二水之會也湘水又逕瀏口戍西北對瀏水

又北瀉水從西南來注之

瀉水出益陽縣馬頭山東逕新陽縣南晉太康元年改曰新康矣瀉水又東入臨湘縣歷瀉口戍東南注湘水湘水又北合斷口又北則下營口湘浦也湘水左岸有高口水出益陽縣西北逕高口戍南又西北上鼻水自鼻洲上口首受湘西入焉謂之上鼻浦高水西北與下鼻浦合水自鼻洲下口首受湘川西通高水謂之下鼻口高水又西北右屈爲陵子潭東北流注湘爲陵子口

湘水自高口戍東又北右會鼻洲左合上鼻口又北右對下鼻口又北得陵子口湘水右岸銅官浦出焉湘水又北逕銅官山西臨湘水山土紫色內含雲母故亦謂之雲母山也

又北過羅縣西澗水從東來流注之

湘水又北逕錫口戍東又北左派謂之錫水西北流逕錫口戍北又西北流屈而東北注玉水焉水出西北玉池東南流注於錫浦謂之玉池口錫水又東北東湖水注之水上承玉池之東湖也南流注於錫謂之三錫逕水南有三戍又東北注於湘湘水自錫口北出又得望

屯浦湘浦也湘水又北枝津北出謂之門逕也湘水紆流西北東北合門水謂之門逕口又北得三溪水口水東承太湖西通湘浦三水之會故得三谿之目耳又北東會大對水口西接三津逕湘水又北逕黃陵亭西右合黃陵水口其水上承太湖湖水西流逕二妃廟南世謂之黃陵廟也言大舜之陟方也二妃從征溺於湘江神遊洞庭之淵出入瀟湘之浦瀟者水清深也一清按水名从水蕭聲相邀切又瀟水清深从水蕭聲子叔切則瀟是水名故朱子以當洞庭九江之一今注以瀟為水清深蓋誤讀說文也又按山海經曰洞庭之山帝之二女居之是常遊於江淵澧沅之風交於瀟湘之浦是在九江之間出入必以飄風暴雨楚地記因之云巴陵瀟湘之淵在九江之間道元既本山海經以立文而刪

去在九江之間一語殆不以洞庭為九湘中記曰湘川江也江水注指東陵在廬江亦同此旨清照五六丈下見底石如樗蒲矢五色鮮明白沙如霜雪赤崖若朝霞是納瀟湘之名矣故民為立祠於水側焉荆州牧劉表刊石立碑樹之於廟以旌不朽之傳矣黃水又西流入於湘謂之黃陵口昔王子山有異才年二十而得惡夢作夢賦二十一溺死於湘浦即斯川矣湘水又北逕白沙戍西又北右會東町口澗水也湘水又左合決湖口水出西陂東通湘渚湘水又北汨水注之水東出豫章艾縣桓山西南逕吳昌縣北與純水合水源出其縣東南純山西北流又東逕其縣南又北逕

其縣故城下縣是吳主孫權立純水又右會汨水汨水
 又西逕羅縣北本羅子國也故在襄陽宜城縣西楚文
 王移之於此秦立長沙郡因以為縣謂之羅水汨水又
 西逕玉笥山羅含湘中記曰屈潭之左有玉笥山道士
 遺言此福地也一曰地腳山汨水又西為屈潭即汨羅
 淵也屈原懷沙自沈於此故淵潭以屈為名一清按說
 文長沙汨
 羅淵屈原所沈之水昔賈誼史遷皆嘗逕此弭檝江波
 从水冥省聲莫狄切
 投弔於淵淵北有屈原廟廟前有碑又有漢南一清按
 南下疑
 落郡太守程堅碑寄在原廟汨水又西逕汨羅戍南西
 字
 流注於湘春秋之羅汨矣世謂之汨羅口湘水又北枝

分北出逕汨羅戍西又北逕壘石山東又北逕壘石戍
 西謂之苟導逕矣而北合湘水自汨羅口西北逕壘石
 山西而北對青草湖亦或謂之為青草山也西對懸城口
 湘水又北得九口竝湘浦也湘水又東北為青草湖口
 右會苟導逕北口與勞口合又北得同拌口皆湘浦右
 迤者也

又北過下雋縣西微水從東來流注之

湘水左會清水口資水也世謂之益陽江湘水左逕鹿
 角山東右逕謹亭戍西又北合查浦又北得萬浦咸湘
 浦也側湘浦北有萬石戍湘水左則沅水注之謂之橫

房口東對微湖世或謂之麋湖也右屬微水即經所謂
 微水逕下雋者也西流注於江謂之麋湖口也湘水又
 北逕金浦戍北帶金浦水湖澁也湘水左則澧水注之
 世謂之武陵江凡此四水同注洞庭北會大江名之五
 渚戰國策曰秦與荆戰大破之取洞庭五渚也湖水廣
 圓五百餘里日月若出沒於其中山海經曰洞庭之山
 帝之二女居焉沅澧之風交瀟湘之浦出入多飄風暴
 雨湖中有君山編山君山有石穴潛通吳之包山郭景
 純所謂巴陵地道者也是山湘君之所遊處故曰君山
 矣昔秦始皇遭風於此而問其故博士曰湘君出入則

多風秦皇乃赭其山漢武帝亦登之射蛟於是山東北
 對編山山多篋竹兩山相次去數十里迴峙相望孤影
 若浮湖之右岸有山世謂之笛鳥頭石石北右會翁湖
 口水上承翁湖左合洞浦所謂三苗之國左洞庭者也
 又北至巴邱山入於江

山在湘水右岸

一清按巴邱山宋人以爲禹貢之東陵曾彥和曰巴陵與夷陵相爲東西夷陵

亦曰西陵則巴陵爲東陵可知又曰沅漸无辰敘西湘資醴水皆合洞庭中東入於江是爲九江導江云過九江至於東陵今之巴陵巴陵之上即洞庭也因九水所合遂名九江水經九江在長沙下雋縣西北楚地記云巴陵瀟湘之淵在九江之間是也晁以道云洞庭九江也胡渭曰以洞庭爲九江始於宋初胡旦而晁曾從之朱子故主其說而力辨尋陽九江之非然去無澧二水而易以瀟蒸則意有未安澧水實會南江以東注洞庭

則可欲以之解禹貢則非矣禹貢導水於導滄下云東
 匯澤為彭蠡此湖漢九水漢儒之所謂九江也導江下
 云又東至於澧過九江至於東陵東迤北會於匯匯即
 東匯澤為彭蠡之匯書法互見則九江在其上游是非
 以洞庭當之不可荆揚二域水道敘次分明 山有巴陵
 彼徒執漢志以疑禹貢紛紛臆說誠何必然 故城本吳之巴邱邱閣城也晉太康元年立巴陵縣於
 此後置建昌郡宋元嘉十六年立巴陵郡城跨岡嶺濱
 岨三江巴陵西對長洲其洲南摩湘浦北屆大江故曰
 三江也三水所會亦或謂之三江口矣夾山列關謂之
 射獵又北對養口咸湘浦也水色青黑東北入於大江
 有清濁之別謂之江會也
 灘水亦出陽海山

灘水與湘水出一山而分源也湘灘之間陸地廣百餘
 步謂之始安嶠嶠即越城嶠也嶠水自嶠之陽南流注
 灘名曰始安水故庾仲初之賦揚都云判五嶺而分流
 者也灘水又南與瀉水合水出西北邵陵縣界而東南
 流至零陵縣西南逕越城西建安十六年交州刺史賴
 恭自廣信合兵小零陵越城迎步騭即是地也瀉水又
 東南流注於灘水漢書所謂出零陵下灘水者也灘水
 又南合彈丸溪水出於彈丸山山有湧泉奔流衝激山
 巖及谿中有石若丸自然珠圓狀彈丸矣故山水即名
 焉驗其山有石竇下深數丈洞穴深遠莫究其極溪水

東流注於灑水灑水又南逕始興縣東魏元帝咸熙二

年吳孫皓分零陵南部立始興縣一清按三國志吳書孫皓傳甘露元年以

零陵南部為始安郡桂陽南部為始興郡宋書州郡志廣興公相孫皓分桂陽南部都尉立為始興郡領始興

令今注云云蓋誤記也且事在甘露元年十一月是為晉武帝泰始元年去魏咸熙二年差一歲灑水

又南右會洛溪溪水出永豐縣西北洛溪山東流逕其

縣北縣本蒼梧之北鄉孫皓割以為縣洛溪水又東南

逕始安縣而東注灑水灑水又東南流入熙平縣逕羊

灑山山臨灑水石閒有色類羊又東南逕雞灑山山帶

灑水石色狀雞故二山以物象受名矣灑水又南得熙

平水口水源出縣東龍山西南流逕其縣南又西與北

鄉谿水合水出縣東北北鄉山西流逕其縣北又西流

南轉逕其縣西縣本始安之扶鄉也孫皓割以為縣谿

水又南注熙平水熙平水又西注於灑水縣南有朝夕

塘水出西南有水從山下注塘一日再增再減盈縮以

時未嘗愆期同於潮水因名此塘為朝夕塘矣灑水又

西逕平樂縣界左合平樂溪口水出臨賀郡之謝沐縣

南歷山西北流逕謝沐縣西南西南流至平樂縣東南

左會謝沐衆谿派流湊合西逕平樂縣南孫皓割蒼梧

之境立以為縣北隸始安谿水又西南流注於灑水謂

之平樂水

南過蒼梧荔浦縣

灑水出縣西北魯山之東逕其縣西與濡水合水出永

豐縣西北濡山東南逕其縣西又東南流入於荔浦縣

注於灑谿又注於灑水灑水之上有關一清按方輿紀要引注云灑水

南逕都利山今本無之灑水又南左合靈谿水口水出臨賀富川

縣北符靈岡南流逕其縣東又南注於灑水也全氏曰灑水一

名融水乃牂柯江之下流分鬱水豚水諸川入於交州復至中國歷三十六灘而為灑水本無關於湘水其引

湘水而通之灑者秦史祿運漕之故水經不知以為湘灑同源此大繆也范成大桂海虞衡志曰湘水源出陽

海山而灑水乃牂柯江下流南下與安地勢高二水遠不相謀史祿始作靈渠派湘之流而注之灑使北水南

合然則灑水不出陽海其自陽海導湘水使合灑水者皆史祿之力也善長於湘灑二篇皆言之不詳亦大疏

漏也又曰范云作靈渠之法於湘流沙磧中壘石作鑊

背鏡其前逆分湘流為兩激之六十里行渠中以入灑

江與俱南渠繞興安界深不數尺廣丈餘六十里置斗

門三十六土人但謂之斗舟入一斗則復聞斗伺水積

漸進故能循崖而上建瓴而下千斛之舟亦可往來治

水巧妙無如此渠零渠通鑑作潏渠即注所謂靈溪也

又曰按柳開曰湘灑二水之名書記皆無說淳化元年

開自全州移知桂州泝湘水抵分水嶺下復溯漓水知

二水至嶺方分所謂相離者也而乃北水曰湘南水曰

漓疑其不當為此漓字酌其理增而今以為字焉仲塗之言頗

為鵲突蓋不識水道而妄生異議者也一清按此事見

漢書嚴助傳云長老言秦之時嘗使尉屠睢擊越又使

監祿鑿渠通道張晏曰監郡御史也名祿又嚴安傳云

使尉屠睢將樓船之士攻越使監祿鑿渠運糧渠即靈

渠也寰宇記云秦鑿渠在興安縣南二十里本灑水自

柘山之陰西北流至縣西南合零渠五里始分為二水

昔秦命御史監祿自零陵鑿至桂林漢故歸義粵侯二

人為戈船下灑將軍出零陵下離水即此郡國志後漢

伏波將軍馬援開湘水為渠六十里穿度南城今城南

水經注

卷三十八

東潛趙氏定本

流者是因秦舊瀆耳至唐寶歷初渠道崩壞舟楫不通
觀察使李渤遂壘石造堤如鑿背劈分二水每水制石
斗門一使制之在人開閉開灑水則全入於桂江擁桂
江則盡歸於湘水又於湘水鑿分水渠三十五步以便
行舟據此則秦渠與零渠為二石湖云激湘
入灑永言云開灑入湘二家言稍有不同

又南至廣信縣入於鬱水

溱水出桂陽臨武縣南繞城西北屈東流

溱水導源縣西南北流逕縣西而北與武谿合山海經
曰肄水出臨武西南注於海入番禺西肄水蓋溱水之
別名也武谿水出臨武縣西北桐柏山東南流右合溱
水亂流東南逕臨武縣西謂之武谿縣側臨溪東因曰
臨武縣王莽更名大武也谿水東南流左會黃岑谿水

水出郴縣黃岑山西南流右合武谿水又南入重山
山名藍豪廣圓五百里悉曲江縣界崖壁峻岨巖嶺干
天交柯雲蔚靈天晦景謂之瀧中懸湍迴注崩浪震山
名之瀧水

東至曲江縣安甯邑東屈西南流

瀧水又南出峽謂之瀧口西岸有任將軍城南海都尉
任囂所築也囂死尉他自龍川始居之東岸有任將軍
廟瀧水又南合泠水水東出泠君山山羣峰之孤秀也
晉太元十八年崩十餘丈於是懸澗瀑挂傾流注壑頽
波所入灌於瀧水瀧水右合林水水出縣東北洹山王

歆之始興記曰林水源裏有石室室前磐石上行羅十
 瓮中悉是餅銀采伐遇之不得取取必迷悶晉太元初
 民封驅之家僕密竊三餅歸發看有大蛇螫之而死湘
 州記曰其夜驅之夢神語曰君奴不謹盜銀三餅即日
 顯戮以銀相償覺視則奴死銀在矣林水自源西流注
 於瀧水又與雲水合水出縣北湯泉泉源沸湧浩氣雲
 浮以腥物投之俄頃即熟其中時有細赤魚遊之不為
 灼也西北合瀧水又有藉水上承滄海水有島嶼焉其
 水吐納衆流西北注於瀧水瀧水又南歷靈鷲山山本
 名虎羣山亦曰虎市山以虎多暴故也晉義熙中沙門

釋僧律葺宇巖阿猛虎遠迹蓋律仁感所致因改曰靈
 鷲山瀧水又南逕曲江縣東又言縣昔號曲紅曲紅山

名也東連岡是矣瀧中有碑文曰一清按瀧中碑是漢

勳銘也其文曰桂陽太守周府君者徐州下邳人也諱

憬字君光體性敦仁天姿薦厚行與閨門名錄州里舉

孝廉拜尚書侍郎選汝南固始相遂拜桂陽迺宣魯齋

之政敷二南之澤政外德綏化猶風騰撫集烝細缺綏

有方進則貞直退則錯枉崇舉濟濟吉土壯克朝招訓

缺蒙開誘六蔽君子道長小人道消信感神祇靈瑞荷

缺嘉穀生於野奇草像蓬蒿異相之樹超然連理於此

缺時郭域惟寧郡又與輿南海接比商旅所臻自瀑亭

至乎曲紅壹由此水其水源也出於王禽之山山蓋隆

所經惡得已改其下注也若奔車失轡狂牛無磨缺勿
 充忽臚陸不相却及其上也則羣輩相隨檀柁提缺唱
 號慷慨沈澹不前其成敗也非徒喪寶玩墮珍奇替珠
 貝坏象犀也注古來今變甚終矣於是府君乃思夏后
 之遺訓缺應龍之畫傷行旅之悲窮哀向人困厄感蜀
 守冰殄絕犁離鼎夫昧淵永用夷易迺命良吏煇帥壯
 夫排積勝石投之窳缺二高墳下鑿截回曲彌水之邪
 性順導其經脉斷硯溢之電波弱陽焦之泓涌由是
 功萬於前除昔缺二樹舉於茲雖非龍門之鴻濟周旋
 人君之德宗故胎辦人嘆於水渚行旅語於涂陸孔子
 曰禹不決江踈河吾其魚矣於是廩平三季歲左攝提
 仲冬之月曲紅長零陵重安區祉字景賢遵承典慮宣
 揚德訓帥禮不越欽仰高山乃與色子故吏龔臺郭蒼
 龔雒等命工擊石建碑于瀧上勒銘公功傳之萬世垂
 示無窮其辭曰乾以剖兮建兩儀剛果兮有險夷咨
 中巒兮穆崔嵬嘆衡林兮獨傾虧增隄隄兮甚隘崎
 莫涉兮禹不規仰王禽兮又崑崙俯瀧淵兮怛以悲岸
 參天兮無路溪石縱橫兮深澗洄波隆隆兮聲若雷或
 抱偵兮以從利或追恩兮有赴義汜月楫兮有不避缺

躬軀兮於元池委性命兮於芒砀憐寒慄兮不皇計忽
 隨深兮殆忘歸懿賢后兮發匪鏗蒺閉不通兮治斯谿
 歷巨石兮吹湮填開切怵兮混瀾瀾息聊啾兮逝轍刻釋
 缺四兮散其波威怒定兮混瀾瀾息聊啾兮逝轍刻釋
 字兮蛟龍滅陸老唱兮臚人歌名岡再兮超踰倫今稱
 缺兮耀深沙功斐斐兮鏡海裔君兮君壽不訾周府君
 開瀧有功嶺表善長不應無隻語贊揚之注文瀧中有
 碑文曰下接按地理志云似有脫誤今從隸釋采錄
 此碑而訛缺太甚又據廣東通志畧為補正彼所遺佚
 不可復考矣此碑名下缺字是為高字迺宜魯衛之政迺
 字是守字屬上讀烝細下缺字是振字招訓缺蒙為招
 賢訓蒙缺文在訓字上靈瑞符下缺字是應字於此下
 缺文是之字山蓋隆下缺字是崇峻極三字泉肇沸踊
 是涌字經下缺字是營滿畛激四字於文為經營滿畛
 激揚爭怒惡得已改其下注也已字下有哉字改字是
 故字恐非惡得已改言無他道也檀柁提缺是檀挽提
 攜其成敗也成字是或字應龍之畫畫字作變化二字
 寥下缺字是壑夷二字於文為投之寥壑夷高填下避
 下缺字是沈字閑不通兮閑或作閔弱下缺字是其勢
 過泌汨五字睦老唱兮老或作夫稱下缺字是揚字餘

見諸跋語中附載於篇次集古錄曰桂陽周府君碑按
 韶州圖經云後漢桂陽太守周府君廟在樂昌縣西一
 百一十八里武溪上武溪驚湍激石流數百里昔馬援
 南征其門人轅寄生善吹笛援為作歌和之名曰武溪
 深其辭曰滔滔武溪一何深鳥飛不渡獸不能臨嗟哉
 武溪何毒淫周府君開此溪下合湏水桂陽人便之為
 立廟刻石武水源出郴州臨武縣鷓鴣石南流三百里
 入桂陽而桂陽水湏水梨溪盧溪曹溪諸水皆與武
 水合流其俗謂水湏浚為龍韓退之詩云南下樂昌龍
 即此水也又後本跋尾云國子監直講劉仲章者為余
 言前為樂昌令因道府君事云名憬問何以見之云碑
 刻雖缺尚可識也乃以此碑并陰遺余初以韓集云
 昌樂瀧疑其誤乃改從樂昌仲章曰不然縣名樂昌而
 瀧名昌樂其舊俗所傳如是韓集不誤也乃知古人傳
 疑而慎於更改者如此曾氏鞏南豐集曰熙寧八年余
 從知韶州王之材求得此本之材又以書來按曲江縣
 圖經周府君名昕字君光其碑陰曲江字皆作曲紅而
 蒼江江夏字亦作紅蓋古字通用不可不知劉氏昌詩
 蘆浦筆記曰漢周府君碑六一先生凡三四百字跋最
 後方辨其名憬蔣穎叔作武溪深乃謂名煜且押之韻

蓋石古剝落以其形似求合於君光之字故云爾曾南
 豐顧云從知韶州王之材得此碑書來曰按曲江縣圖
 經名昕則并其形似而不辨何至遽信而以六一為未
 詳攷耶金石錄曰周府君碑陰題名凡卅一人姓氏具
 存酈道元水經注瀧水南逕曲江縣東縣昔號曲紅長
 紅山名也而東西兩漢史皆作曲江今據此碑自縣長
 區社而下凡十七人皆書為曲江則是當時縣名曲紅
 無可疑者不知兩漢皆作曲江何也隸釋曰右神漢桂
 陽太守周府君功勳之紀銘隸額周府君名憬自固始
 相為桂陽守碑云熹平三年歲在攝提仲冬之月曲紅
 長區社與色子故吏建碑於瀧上蓋靈帝甲寅年也茲
 水發源王禽山千渠萬澮下湊六瀧舟楫過之若奔車
 失轡狂牛無縻喪寶玩流象犀積有日矣周府君思夏
 后龍門之績感李冰離堆之事排治湍梗人得利涉紀
 其功勳銘辭全逼騷雅有瓠子歌遺意韓退之詩云南
 下昌樂瀧險惡不可狀者即謂此也樂史寰宇記云瀧
 上有太守周昕廟今碑在韶州張九齡廟中其名尚隱
 隱可辯蓋憬字也碑以壅藹為壅遏犁魁為犁堆小溪
 路後皆為蹊又曰周憬碑陰宰曲江者一人貫曲紅者
 十六人熊君碑亦仝兩漢皆作曲江諸家地理書皆云

水流屈曲故曰曲江唯水經云縣昔號曲紅山之名也前書工女大功皆只同用紅字未知水經何所據也盤洲之言本於南豐寰宇記梓州射洪縣下引李膺記云婁儂灘東有射江土人語訛以江為洪則知曲江之為曲紅亦是音同之故熊君碑是漢綏民校尉熊君也碑云除補桂陽曲紅長故洪氏引以為證佐爾按地

理志曲江舊縣也王莽以為除虜始興郡治魏文帝咸

熙二年孫皓分桂陽南部立

一清按三國志吳書此事在甘露元年是晉武帝泰

始元年去魏咸熙二年差一歲

縣東傍瀧谿號曰北瀧水水左即東谿

口也水出始興東江州南康縣界石閣山西流而與漣

水合水出南康縣涼熱山漣谿山即大庾嶺也五嶺之

最東矣故曰東嶠山斯則改裝之次其下船路名漣谿

漣水南流注於東谿謂之漣口庾仲初謂之大庾嶠水

也東谿亦名東江又曰始興水又西邪階水注之水出

縣東南邪階山水有別源曰巢頭重嶺衿瀧湍奔相屬

徂源雙注合為一川水側有鼻天子城鼻天子所未聞

也朱氏謀瑋箋曰幽明錄始興有鼻天子冢又有鼻天子城路史謂鼻天子即象也

邪階水又

西北注於東江江水又西逕始興縣南又西入曲江縣

邸水注之水出浮嶽山山躡一處則百餘步動若在水

也因名浮嶽山南流注於東江東江又西與利水合水

出縣之韶石北山南流逕韶石下其高百仞廣圓五里

兩石對峙相去一里小大畧均似雙闕名曰韶石古老

言昔有二仙分而憩之自爾年豐彌歷一紀利水又南

逕靈石下靈石一名逃石高三十丈廣圓五百丈者舊傳言石本桂林武城縣因夜迅雷之變忽然遷此彼人來見歎曰石乃逃來因名逃石以其有靈運徙又曰靈石其傑處臨江壁立霞駁有若續焉水石驚瀨傳響不絕商舟淹留聆翫不已利水南注東江東江又西注於北江謂之東江口漆水自此有始興大庾之名而南入

過滇陽縣出涯浦關與桂水合

滇水南逕滇陽縣西舊漢縣也王莽之基武矣縣東有滇石山廣圓三十里挺嶠大江之北盤陟長川之際其

陽有石室漁叟所憩昔欲於山北開達郡之路輒有大蛇斷道不果是以今行者必於石室前汎舟而濟也漆

水又西南歷臯口太尉二山之間是曰滇陽峽兩岸傑秀壁立虧天昔嘗鑿石架閣令兩岸相接以拒徐道覆

漆水出峽左則滇水注之水出南海龍川縣西逕滇陽

縣南右注漆水故應劭曰滇水西入漆是也

滇陽縣下應劭曰滇水出南海龍川西入秦道元引之分而為二上句又不云是應說漆水又西

南涯水入焉山海經所謂湟水出桂陽西北東南注肄

入敦浦西者也漆水又西南逕中宿縣會一里水其處

隘名之為觀岐連山交枕絕岸壁竦下有神廟背阿面

流壇宇靈肅廟渚攢石巉巖亂峙中川時水洊至鼓怒
沸騰流木淪沒必無出者世人以爲河伯下材晉中朝
時縣人有使者至洛事訖將還忽有一人寄其書云吾
家在觀岐前石閒懸藤卽其處也但扣藤自當有人取
之使者謹依其言果有二人出外取書并延入水府衣
不霑濡言此似不近情然造化之中無所不有穆滿西
遊與河宗論寶以此推之亦爲類矣漆水又西南逕中
宿縣南吳孫皓分四會之北鄉立焉

南入於海

漆水又南注於鬱而入於海

水經注釋卷三十八終

水經注釋

卷三十八

三
東潛趙氏定本

水經注釋卷三十九

仁和趙一清誠夫錄

涇水

深水

鍾水

耒水

涿水

澠水

瀏水

澗水

贛水

廬江水

涇水出桂陽縣盧聚

一清按今俗本涇俱作涇誤也說文

為彭蠡孔傳曰涇迴也釋文曰徐胡罪反韋空為反別無

水出桂陽之說又說文涇水出桂陽縣盧聚出涇浦關為

桂水从水匿聲去王切與水經合予宿疑水經涇水標題

與下合涇字義不符觀叔重之書始知後來傳寫之誤班

志桂陽縣涇水南至四會入鬱林過郡二行九百里應劭

曰桂水所出東北入湘合涇縣應劭曰涇水所出東北入

沅今水經不言涇水所入之處漆水篇云過涇陽縣出涇

浦關與桂水合南入于海注云漆水又南注于鬱而至于

海是桂水與溱水俱注于鬱而入海與班志膈合臨武縣
 下又云溱水東南南至滇陽入滙師古曰滙胡賄反蓋滙與
 桂音近而與滙形似滙水即桂水亦即滙水道元所謂山
 海經謂之滙水桂水其別名者是也滙集韻曰本作滙隸
 省作滙漢書作滙今作滙蓋因避宋太祖諱匡缺筆作匡
 而誤作滙耳溱水注黃本作滙水亦即滙字之訛誤故應
 劭以桂水釋桂陽滙水釋合滙而不別出滙水最為得解
 史記南越傳云移檄告橫浦陽山滙溪關裴駟集解云徐
 廣云在桂陽通四會也索隱曰鄒氏劉氏本滙並作滙音
 年結反漢書作滙溪音皇又衛青傳云出桂陽下滙水姚
 察曰史記作滙今本有滙滙及滙不同蓋由隨見輒改故
 也水經云含滙縣南有滙浦關未知孰是然鄒誕作滙漢
 書作滙蓋近于古今考水經惟篇首作滙字下含滙縣滙
 浦關皆作滙小司馬以漢書滙字為近古得之矣若作滙
 字去滙音益遠更作滙字尤無所據字經三寫魯變為魚
 信矣九域志云開寶四年改含滙縣為含光避太祖諱也
 可知至宋猶仍滙水之稱滙字之誤審矣全祖望曰水經
 作滙與說文合史記作滙與山經合水經又作桂亦與說
 文合若滙則滙之似而訛猶之滙則滙之似而訛也而又
 有作滙水者則桂音之近而譌道元特起而糾之今本滙

又轉誤作雞
 益不足辨矣

水出桂陽縣西北上驛山盧溪為盧溪水東南流逕桂

陽縣故城謂之滙水地理志曰滙水出桂陽南至四會

是也滙水又東南流出桂陽南至四會是嶠之溪溪水

下流歷峽南出是峽謂之貞女峽峽西岸高巖名貞女

山山下際有石如人形高七尺狀如女子故名貞女峽

古來相傳有數女取螺於此遇風雨晝晦忽化為石斯

誠巨異難以聞信但啟生石中擊呱空桑抑斯類矣物

之變化寧以理求乎溪水又合滙水滙水又東南入陽

山縣右合漣口水源出縣西北一百二十里石塘村村

之流水側有豫章木本徑可二丈其株根猶存伐之積載而斧跡若新羽族飛翔不息其傍衆枝飛散遠集鄉亦不測所如唯見一枝獨在含淮水矣漣水東南流注于淮淮水又東南流而右與斟水合水導源近出東巖下穴口若井一日之中十溢十竭信若潮流而注淮水淮水又南逕陽山縣故城西者舊傳曰往昔縣長臨縣輒遷擢超級太史逕觀言城勢使然掘斷連岡流血成川城因傾陔遂卽傾敗閣下大鼓飛上臨武乃之桂陽追號聖鼓自陽山達乎桂陽之武步驛所至循聖鼓道也其道如塹迄于鼓城矣淮水又逕陽山縣南縣故舍

淮縣之桃鄉孫皓分立爲縣也淮水又東南流也

東南過含淮縣

應劭曰淮水東北入沅瓚注漢書沅在武陵去淮遠又隔湘水不得入沅淮水東南左合翁水水出東北利山湖湖水廣圓五里潔踰凡水西南流注于淮謂之翁水口口已下東岸有聖鼓杖卽陽山之鼓杖也橫在川側雖衝波所激未嘗移動百鳥翔鳴莫有萃者船人上下以篙撞者輒有瘡疾淮水又東南左合陶水水東出堯山山盤紆數百里有赭巖迭起冠以青林與雲霞亂采山上有白石英山下有平陵有大堂基者舊云堯行宮

所陶水西逕縣北右注涇水涇水又逕含涇縣西王歆之始興記曰縣有白鹿城城南有白鹿岡咸康中郡民張魴為縣有善政白鹿來遊故城及岡並即名焉南出涇浦關為桂水

關在中宿縣涇水出關右合溱水謂之涇口山海經謂之涇水徐廣曰涇水一名涇水出桂陽通四會亦曰涇水也漢武帝元鼎元年路博德為伏波將軍征南越出桂陽下涇水即此水矣桂水其別名也

深水

一清按深說文作寔

出桂陽盧聚

呂忱曰深水一名邃水導源盧溪西入營水亂流營波

同注湘津許慎云深水出桂陽南平縣也經書桂陽者縣也本隸桂陽郡後割屬始興縣有盧溪盧聚山在南平縣之南九疑山東也

西北過零陵營道縣南又西北過營浦縣南又西北過泉陵縣西北七里至燕室邪入于湘

水上有燕室邱亦因為聚名也其下水深不測號曰龍泉

鍾水出桂陽南平縣都山北過其縣東又東北過宋渚亭又北過鍾亭與灌水合

都山即部龍之嶠也五嶺之第三嶺也

一清按後漢書吳佑傳章懷注

引南康記曰五嶺南康大庾一也桂陽甲騎二也九真都龐三也臨賀萌渚四也始安越嶠五也廣州記則以為大庾一始安二臨賀三桂陽四而以九真為揭陽合為五嶺是注所言五嶺之次與鄧記合第考班志九真郡有都龐縣應劭曰龐音龍師古曰音龔而桂陽之部龍乃嶺嶠之名王象之輿地紀勝曰山之絕頂曰都逢土人語訛曰龐也不知都部字相似龐龍音相聯而強以都逢為土音山之絕頂之說殆因嶺嶠而傳會耶此與九真之都龐縣無涉鄧記誤也當以南平部龍為是

鍾水即嶠水也庾仲初曰嶠水南入始興灌水一清按耒水篇引庾說作始興溱水蓋溱水出涯浦關與桂水合也

注于海北一清按耒水篇引庾說北字下多一水字入桂陽湘水注于江是也灌水即桂水也灌桂聲相近故字隨讀變經仍其非矣桂水出桂陽縣北界山山壁高聳三面特峻石泉懸注瀑布而下北逕南平縣而東北流屆鍾亭右會鍾水

通為桂水也故應劭曰桂水出桂陽東北入湘

又北過魏寧縣之東

一清按續志桂陽郡漢寧縣永和元年置吳改曰陽安晉改曰晉寧宋以後因之無魏寧也此如廣魏魏與之類道元蓋併經而改之

魏寧故陽安也晉太康元年改曰晉寧縣在桂陽郡東一百二十里縣南西二面咀帶清溪桂水無出縣東理蓋縣邑流移今古不同故也

又東北入于湘

耒水出桂陽郴縣南山

耒水發源出汝城縣東烏龍白騎山西北流逕其縣北西流三十里中有十四瀨各數百步濬流奔急竹節相

次亦為行旅溯涉之艱難也又西北逕晉寧縣北又西左合清溪水口水出縣東黃皮山西南流歷縣南又西北注于耒水汝城縣在郡東三百里餘山又在縣東耒水無出南山理也

又北過其縣之西

縣有淶水出縣東俠公山西北流而南屈注于耒謂之程鄉溪郡置酒官醞于山下名曰程酒獻同鄴也耒水

又西黃水注之水出縣西黃岑山山則騎田之嶠一清按南

康記作甲騎

五嶺之第二嶺也黃水東北流案盛宏之云衆

山水出注于大溪號曰橫流溪溪水甚小冬夏不乾俗

亦謂之為貪泉飲者輒冒於財賄同於廣州石門貪流

矣廉介為二千石則不飲之昔吳隱之挹而不亂貪豈

謂能汙其貞乎蓋亦惡其名也劉澄之謂為一涯溪通四

會殊為孟浪而不悉也庾仲初云嶠水南入始興淶水

注海即黃岑水入武溪者也一清按黃岑曲紅碑作王禽北水入桂

陽湘水注于大江即是水也右則千秋水注之水出西

南萬歲山山有石室室中有鍾乳山上悉生靈壽木溪

下即千秋水也水側民居號萬歲村其水下合黃水黃

水又東北逕其縣東右合除泉水水出縣南湘陂村村

有圓水廣圓可二百步一邊暖一邊冷冷處極清綠淺

則見石深則見底暖處水白且濁元素既殊涼暖亦異厥名除泉其猶江乘之半湯泉也水盛則瀉黃溪水耗

則津徑輟流柳舊縣也桂陽郡治也漢高帝二年分長

沙置地理志曰桂水所出因以名也一清按漢志桂陽郡無此語此是應

註在桂陽縣下王莽更名南平縣曰宣風其城項羽遷

義帝所築也縣南有義帝冢內有石虎因呼為白虎郡

東觀漢記曰茨充字子何為桂陽太守民惰懶少鹿履

足多剖裂茨教作履今江南知織履皆充之教也黃溪

東有馬嶺山高六百餘丈廣圓四十許里漢末有郡民

蘇耽栖遊此山桂陽列仙傳云耽柳縣人少孤養母至

孝言語虛無時人謂之癡常與眾兒共牧牛更直為帥

錄牛無散每至耽為帥牛輒徘徊左右不逐自還眾兒

曰汝直牛何道不走耶耽曰非汝曹所知即面辭母云

受性應仙當違供養涕泗又說年將大疫死者略半穿

一井飲水可得無恙如有哭聲甚哀後見耽乘白馬

還此山中百姓為立壇祠民安歲登民因名為馬嶺山

朱氏謀埤箋云無恙以下有缺文洞神傳云耽初去時云今年大疫死者略半家中井水飲之無恙果如所言

闔門元吉母年百餘歲終鄉人共葬之聞山上有入哭聲服除乃止神仙傳曰耽母既終葬後州東北牛脾山

紫雲蓋上有號哭聲知蘇君之神因見黃水又北流注

于未水謂之柳口未水又西逕華山之陰亦曰華石山

孤峯特聳枕帶雙流東則黃溪未水之交會也未水東流沿注不得北過其縣西也兩岸連山石泉懸溜行者輒徘徊畱念情不極已也

又北過便縣之西

縣故惠帝封長沙王子吳淺為侯國全氏曰按漢表以為江夏之編索隱

曰縣屬桂陽當從道元為是淺以惠帝元年封王莽之便屏也縣界有溫泉水

在郴縣之西北左右有田數十畝資之以溉常以十二月下種明年三月穀熟度此水冷不能生苗溫水所溉年可三登其餘波散流入于未水也

又西北過未陽縣之東

未陽舊縣也蓋因水以制名王莽更名南平亭東傍未水水東肥南有郡故城縣有溪水東出侯計山其水清澈冬溫夏冷西流謂之肥川川之北有盧塘塘池八頃其深不測有大魚常至五月輒一奮躍水湧數丈波囊四陸細魚奔迸隨水登岸不可勝計又云大魚將欲鼓作諸魚皆浮聚水側注西北逕蔡洲洲西即蔡倫故宅傍有蔡子池倫漢黃門順帝之世擣故魚網為紙用代簡素自其始也

又北過鄰縣東

縣有鄰湖湖中有洲洲上民居彼人資以給釀酒甚醇

美謂之酈酒歲常貢之湖邊尚有酈縣故城治此西北去臨承縣一十五里從省隸十三州志曰大別水南出耒陽縣太山北至酈縣入湖也

北入于湘

耒水西北至臨承縣而右注湘水謂之耒口也

沘水出茶陵縣上鄉西北過其縣西

水出江州安成郡廣興縣太平山西北流逕茶陵縣之

南名勝志衡州府酈縣下云沘水源出沘泉注水經云泉不常見遇邑政清明年穀豐稔其泉淅然如米泔瀑湧者舊相傳疾者飲此多愈今本無之一清按今酈縣本漢茶陵縣地宋嘉定四年置非漢之酈縣也漢武帝元朔四年封長沙定王子節侯訖之邑也
一清按史表作

欣此從漢表師王莽更名聲鄉矣沘水又屈而過其縣古曰訖與欣同

西北流注也地理志謂之泥水者也

又西北過攸縣南

攸水出東南安成郡安復縣封侯山西北流逕其縣北

縣北帶攸溪蓋卽溪以名縣也漢武帝元朔四年封長

沙定王子則爲攸興侯一清按索隱曰按今長沙有攸縣本名攸興乎表在南陽小司

馬蓋本卽地理志所謂攸縣者也攸水又西南流入茶

陵縣入于沘水也

又西北過陰山縣南

縣本陽山縣也縣東北猶有陽山故城卽長沙孝王子

宗之邑也

一清按漢表宗以元帝永光二年封

形家言其勢王故塹山堙

谷改曰陰山縣

一清按漢志桂陽郡有陽山縣又有陰山縣皆云侯國至續志有陰山無陽山

蓋東京省併之故應劭曰陽山今陰山也而師古以應說為非殆未詳考也宋志云陰山今漢舊縣屬桂陽吳

湘東郡有此疑是吳所立沈約所云亦非孫吳所立是湘東郡而度桂陽之陰山縣隸之故晉志湘東郡有陰

山縣陰山縣未嘗廢省何容復立乎縣上有容水自侯曇山下注沘水謂

之容口水有大穴容一百石水出於此因以名焉沘水

又西北逕其縣東又西逕歷口縣有歷水下注沘水謂

之歷口沘水又西北與洋湖水會水出縣西北樂藪罌

下洋湖湖去罌七里湖水下注沘謂之洋湖口沘水東

北有峩山縣東北又有武陽龍尾山並仙者羽化之處

上有仙人及龍馬跡於其處得遺咏雖神栖白雲屬想

芳流藉念泉鄉遺咏在茲覽其餘誦依然息遠匪直邈

想霞蹤愛其文咏可念故端牘抽札以詮其咏其略曰

登武陽觀樂藪峩嶺千蕤洋湖口命蜚螭駕白駒臨天

水心踟躕千載後不知如蓋勝賞神鄉秀情超拔矣

又西北入于湘

漉水出醴陵縣東漉山西過其縣南

醴陵縣高后四年封長沙相侯越為國縣南臨淥水水

東出安城鄉翁陵山余謂漉淥聲相近後人藉便以淥

為稱雖翁陵名異而即麓是同

屈從縣西西北流至澧浦注入于湘

澧水出臨湘縣東南澧陽縣

一清按澧陽縣本漢臨湘縣地孫吳析置以縣在澧水之

陽故名據此亦經文晚出之一證全祖望曰三國志周瑜傳以下雋漢昌澧陽州陵為奉邑則澧陽自漢末已有其名雖未為縣而已為邑若作邑字于經為合西北過其縣東北與澧溪水合

澧水出縣東江州豫章縣首禪山

全祖望曰按顧祖禹曰今澧陽之大圍山

即首禪山其水曰白沙湖分四派一入袁之萬載一入分寧一入岳之中江其一即澧水予謂據顧說則經文所言是也善長誤以分寧之水當之不知首禪山不在豫章也導源西北流逕其縣南

縣憑溪以即名也又西北注于臨湘縣也

西入于湘

澧水出豫章艾縣

春秋左氏傳曰吳公子慶忌諫夫差不納居于艾是也

王莽更名治翰

西過長沙羅縣西

羅子自枝江徙此世猶謂之為羅侯城也澧水又西流

積而為陂謂之町湖也

又西至累石山入于湘水

累石山在北亦謂之五木山山方尖如五木狀故俗人

藉以名之山在羅口北澧水又在羅水南流注于湘謂

之東町口者也

澧水出豫章南壘縣西北過贛縣東

山海經曰贛水出聶都山東北流注于江入彭澤西也
 班固稱南壘縣彭水所發東入湖漢水庾仲初謂大庾
 嶠水北入豫章注于江者也地理志曰豫章水出贛縣
 西南而北入江蓋控引眾流總成一川雖稱謂有殊言
 歸一水矣故後漢郡國志曰贛有豫章水雷次宗云似
 因此水為其地名雖十川均流而此源最遠故獨受名
 焉劉澄之曰縣東南有章水西有貢水縣治二水之間
 二水合贛字因以名縣焉是為繆也劉氏專以字說水
 而不知遠失其實矣全氏曰按章貢圖經曰東江發源
 于汀州界之新樂山逕雩都而會
 于章水西江導源于大庾縣之聶都山與貢水合二水
 合而為贛則激之之言未可非也如善長所引山經及

庾說但有貢水而無章水恐未足以釋贛水之義也沈
 氏曰近世皆以豫章水為章水湖漢水為貢水所歷十
 八難之險黃公灘為
 最即所謂惶恐灘也豫章水導源東北流逕南壘縣北

贛川石岨水急行難傾波委注六十餘里又北逕贛縣
 東縣即南康郡治晉太康五年分廬江立豫章水右會
 湖漢水水出雩都縣導源西北流逕金雞石其石孤竦
 臨水耆老云時見金雞出于石上故石取名焉湖漢水
 又西北逕贛縣東西入豫章水也
 又西北過廬陵縣西

廬陵縣即王莽之桓亭也十三州志稱廬水西出長沙
 安復縣武帝元光六年封長沙定王子劉蒼為侯國即

王莽之思成也一清按漢書地理志長沙國安成縣侯國續漢書郡國志無之蓋省併也吳復置晉太康元年改曰安復王子侯表蒼封是安成非安復也吳寶鼎中立以為安成郡東至廬陵入湖漢水也

又東北過石陽縣西

漢和帝永平九年分廬陵立漢獻帝興平二年吳長沙桓王立廬陵郡治此豫章水又逕其郡南城中有井其水色半青半黃黃者如灰汁取作飲粥悉皆金色而甚芬香

又東北過漢平縣南

一清按後漢中平中立漢平縣吳改曰吳平此亦經文晚出之證又

東北過新淦縣西

牽水西出宜春縣漢武帝元光六年封長沙定王子劉成為侯國王莽之脩曉也牽水又東逕吳平縣舊漢平也晉太康元年改為吳平矣一清按宋志吳平侯相吳更名牽水又東逕新淦縣即王莽之偶亭而注于豫章水湖漢及贛並通稱也又淦水出其縣下注于贛水

又北過南昌縣西

盱水出南城縣西北流逕南昌縣南西注贛水又有濁

水注之水出康樂縣故陽樂也

一清按宋志康樂侯相吳孫權黃武中立曰陽

濁水又東逕望蔡縣縣因汝南上蔡民萍

居此土晉太康元年改為望蔡縣

一清按劉昭郡國志補注引豫章記日上

蔡縣中平立此地名上蔡者上蔡民分徙此地立名上蔡然則漢縣本名上蔡也濁水又東逕

建成縣漢武帝元光沈氏曰按本表是元朔四年封長沙定王子

劉拾為侯國王莽更名之曰多聚也縣出然石異物志

曰石色黃白而理疎以水灌之便熱以鼎著其上炊足

以熟置之則冷灌之則熱如此無窮元康中雷孔章入

洛賫石以示張公張公曰此謂然石於是乃知其名濁

水又東至南昌縣東流入于贛水贛水又歷白社西有

徐孺子墓吳嘉禾中太守長沙徐熙於墓隧種松太守

南陽謝景於墓側立碑永安中太守梁郡夏侯嵩於碑

傍立思賢亭松大合抱亭世修治至今謂之聘君亭也

贛水又北歷南塘塘之東有孺子宅際湖南小洲上孺

子名稚南昌人高尚不仕太尉黃瓊辟不就桓帝問尚

書令陳蕃徐稚袁閎誰為先後蕃答稱袁生公族不鏤

自雕至於徐稚傑出薄域故宜為先桓帝備禮徵之不

至太原郭林宗有母憂稚往弔之置生芻於廬前而去

眾不知其故林宗曰必孺子也詩云生芻一束其人如

玉吾無德以堪之年七十二卒贛水又逕谷鹿洲即蓼

子洲也舊作大編處贛水又北逕南昌縣故城西於春

秋屬楚即令尹子蕩師於豫章者也秦以為廬江南部

漢高祖六年始命陳嬰一清按下有脫文以為豫章郡治此即

陳嬰所築也王莽更名縣曰宜善郡曰九江焉劉歆云湖漢等九水入彭蠡故言九江矣陳蕃為太守署徐稚為功曹蕃在郡不接賓客唯稚來特設一榻去則懸之此即懸榻處也建安中更名西安晉又名為豫章一清按兩漢及晉豫章郡治南昌晉志豫章郡領豫章縣劉昭郡國志補注引豫章記曰豫章縣建安立三國吳改曰西安故晉志豫章郡有豫章縣蓋復漢之舊也晉志不言豫章宋志不記豫章均為脫漏且宋志云豫章太守領豫寧侯相漢獻帝建安中立吳曰要安晉武帝太康元年更名要安又是西安之誤吳書太史慈傳數為寇于艾西安是也城在今武寧縣西二十里前漢為海昏後漢為建昌縣地去南昌府城三百二十里非郡治也此注言豫章郡治而釋以西安疑庸妄城之南門曰松陽人所填改觀下彭澤注却甚分明

門門內有樟樹高七丈五尺大二十五圍枝葉扶疎垂

蔭數畝應劭漢官儀曰豫章樟樹生庭中故以名郡矣此樹嘗中枯逮晉永嘉中一旦更茂豐蔚如初咸以為中宗之祥也禮斗威儀曰君政訟平豫樟常為生太與中元皇果興大業于南故郭景純南郊賦云樊樟擢秀于祖邑是也以宣王祖為豫章故也贛水北出際西北歷度支步是晉度支校尉立府處步即水渚也贛水又逕郡北為津步步有故守賈萌廟萌與安成侯張普爭

地為普所害即日靈見津渚故民為立廟焉全氏曰賈

御覽引謝承後漢書謂是討莽而死又引安成記謂爭地而死然考之漢書王莽傳則是為莽九江太守拒漢而死其亦異矣豈同時先後之間有二賈萌又皆為南州牧守耶一清按寰宇記洪州南昌縣龍沙廟即西漢

末太守賈萌也萌與安成侯張普共謀誅王莽普反告莽收萌而殺之時人咸嘆故為立廟祭之事更詳核尤可與班書參異同也

水之西岍有磐石謂之石頭津步之處也西

行二十里曰厭原山疊嶂四周杳邃有趣晉隆安末沙

門竺曇顯建精舍於山南僧徒自遠而至者相繼焉西

北五六里有洪井飛流懸注其深無底舊說洪崖先生

之井也北五六里有風雨池言山高瀨激激著樹木霏

散遠灑若雨西有鸞岡洪崖先生乘鸞所憩泊也岡西

有鵠嶺云王子喬控鵠所逕過也有二崖號曰大蕭小

蕭言蕭史所遊萃處也雷次宗云此乃繫風捕影之論據

實本所未辯聊記奇聞以廣井魚之聽矣又按謝莊詩

莊嘗遊豫章觀井賦詩言鸞岡四周有水謂之鸞陂似

非虛論矣東大湖十里二百二十六步北與城齊周氏必大

汎舟遊山錄云徐孺子亭在東湖徐宅名見水經又乾道庚寅奏事錄云東湖徐孺子亭洪芻職乘云湖在郡

東南周廣五里鄴道元云十里一百二十步寰宇記引雷次宗豫章記曰州城東有大湖北與城齊一清按今

文似有脫誤南緣迴折至南塘水通章江增減與江水同漢

永元中太守張躬築塘以通南路兼遏此水冬夏不增

減水至清深魚甚肥美每於夏月江水溢塘而過居民

多被水害至宋景平元年太守蔡君西起隄開塘為水

門水盛旱則閉之內多則洩之自是居民少患矣贛水

又東北逕王步步側有城云是孫奮為齊王鎮此城之

渚今謂之王步蓋齊王之渚步也郡東南二十餘里又有一城號曰齊王城築道相通蓋其離宮也贛水又北

逕南昌左尉廨西漢成帝時九江梅福為南昌尉居此

後福一旦捨妻子去九江傳云得仙一清按六字注中注贛水又

北逕龍沙西沙甚潔白高峻而陁有龍形連亘五里中

舊俗九月九日升高處也昔有人於此沙得故冢刻碑

題云西去江七里半筮言其吉卜言其凶而今此冢垂

沒於水所謂筮短龜長也贛水又逕椒邱城下建安四

年孫策所築也朱氏謀埠箋曰雷次宗豫章記云建安四年孫策破劉勳于潯陽欲謀取豫章

太守華歆于郡下流一百四十里臨江築椒邱城以備之一清按然則椒邱城非策所築其後策駐軍于此以

脅華歆遂以名之贛水又歷釣圻邱閣下度支校尉治太尉陶

侃移置此也舊夏月邱閣前洲沒去浦遠景平元年校

尉豫章因運出之力於渚次聚石為洲長六十餘丈洲

裏可容數十舫贛水又北逕鄒陽縣王莽之豫章縣也

餘水注之水東出餘汗縣王莽名之曰治干也餘水北

至鄒陽縣注贛水贛水又與鄱水合水出鄱陽縣東西

逕其縣南武陽鄉也地有黃金可采一清按漢志鄱陽縣下云武陽鄉右

十餘里有黃金采師古曰采者謂采取金之處可字衍王莽改曰鄉亭孫權以建

安十五年分為鄱陽郡鄱水又西流注于贛又有繚水

入焉其水導源建昌縣漢元帝永光二年分海昏立繚

水東逕新吳縣漢中平中立繚水又逕海昏縣王莽更名宜生謂之上繚水又謂之海昏江分為二水縣東津上有亭為濟渡之要其水東北逕昌邑城而東出豫章大江謂之慨口昔漢昌邑王之封海昏也每乘流東望輒憤慨而還世因名焉其一水枝分別注入于脩水也又北過彭澤縣西

脩水出艾縣西東北逕豫寧縣故西安也晉太康元年更從今名脩水又東北逕永脩縣漢靈帝中平二年立脩水又東北注贛水其水總納十川同漆一瀆俱注于彭蠡也一清按漢志豫章郡彭蠡縣禹貢彭蠡澤在西廬江郡尋陽縣禹貢九江在南皆東合為大江

九江郡下應劭曰江自廬江尋陽分為九全祖望曰郡國志云贛有豫章水雷次宗云十川均流此源最遠善長亦云贛水總納十川按漢志豫章郡贛縣下云豫章水出西南北入大江雩都縣下云湖漢水東至彭澤入江行千九百八十里即注所謂豫章水右會湖漢水者也其十川漢志南壑縣下云彭水東入湖漢長沙國安成縣下云廬水東至廬陵入湖漢宜春縣下云南水東至新淦入湖漢新淦縣下應劭曰淦水所出西入湖漢南城縣下云盱水西北至南昌入湖漢建縣下云蜀水東至南昌入湖漢餘汗縣下云餘水在北至鄒陽入湖漢鄒陽縣下云鄒水西入湖漢艾縣下云脩水東北至彭澤入湖漢行六百六十里蓋十川者合湖漢水之經流而為十也湖漢水源最長次之則脩水今校之水經鄱水下多繚水則除湖漢水得十川一清按此是漢代之九江而非禹貢之九江禹貢之九江自當以洞庭為據猶之三江班固地理志所云乃漢時現行之水道而于禹貢亦無與也

北入于江

大江南贛水總納洪流東西四十里而清潭遠漲綠波凝淨而會注于江川

廬江水出三天子都北過彭澤縣西北入于江

山海經三天子都一曰天子鄣王彪之廬山賦敘曰廬山彭澤之山也雖非五嶽之數穹窿嵯峨實峻極之名山也孫放廬山賦曰尋陽郡南有廬山九江之鎮也臨彭蠡之澤接平敞之原開山圖曰山四方周四百餘里疊鄣之巖萬仞懷靈抱異苞諸仙迹豫章舊志曰廬俗字君孝本姓匡父東野王共鄱陽令吳芮佐漢定天下而亡漢封俗於鄡陽曰越廬君俗兄弟七人皆好道術

遂寓精爽於宮庭之山故世謂之廬山漢武帝南巡觀

山以為神靈封俗大明公遠法師廬山記曰殷周之際

匡俗先生受道仙人共遊此山一清按慧遠廬山記曰匡俗先生受道于仙人

朱箋本作奚道仙人則似道號矣時人謂其所止為神

仙之廬因以名山矣又按周景式曰廬山匡俗字子孝

本東里子出周武王時生而神靈屢逃徵聘廬於此山

時人敬事之俗後仙化空廬猶存弟子觀室悲哀哭之

旦暮事同烏號世稱廬君故山取號焉斯耳傳之談非

實證也故豫章記以廬為姓因廬以氏周氏遠師或託

廬墓為辭假憑虛以託稱二證既違三情互爽按山海

經創志大禹記錄遠矣故海內東經曰廬江出三天子都入江彭澤西是曰廬江之名山水相依互舉殊稱明不因匡俗始正是好事君子強引此類用成章句耳又按張華博物志曹著傳其神自云姓徐受封廬山後吳猛經過山神迎猛猛語曰君王此山近六百年符命已盡不宜久居非據猛又贈詩云仰矚列仙館俯察王神宅曠載暢幽懷傾蓋付三益此乃神道之事亦有換轉理難詳矣吳猛隱山得道者也尋陽記曰廬山上有三石梁長數十丈廣不盈尺杳然無底吳猛將弟子登山過此梁見一翁坐桂樹下以玉杯承甘露漿與猛又至

一處見數人為猛設玉膏猛弟子竊一寶欲以來示世人梁即化如指猛使送寶還手牽弟子令閉眼相引而過其山川明淨風澤清曠氣爽節和土沃民逸嘉遯之士繼響窟巖龍潛鳳采之賢往者忘歸矣秦始皇漢武帝及太史公司馬遷咸升其巖望九江而眺鍾彭焉

清一

按鍾彭謂石鍾山及彭蠡澤也今注無石鍾山之文而唐時李渤作記尚引水經并酈注其為缺失無疑也寰宇記云南康軍都昌縣本漢彭蠡縣也石鍾山在縣北二百一十里西枕彭蠡連峰疊嶂壁立峭峻西南北面皆水四時如一白波撼山其聲若鍾因名之按辨石鍾山記云水經云彭蠡之口有石鍾山酈道元以為下臨深潭微風鼓浪水石相搏響若洪鍾因受其稱予幽棲者因尋繹東湖沿瀾窮此遂躋嵯穿洞訪其遺踪次于南隅忽遇雙石欹枕潭際影淪波中詢諸水濱乃曰石鍾也有銅鐵之異焉扣而聆之南音函胡北音清越枹

止響騰餘韻徐歇若非澤滋其山山舍其英聯氣凝質
發為至靈不然則安能產茲奇石乎乃知山仍石名舊
矣如善長之論則瀕流庶峰皆可以斯名貫之聊刊前
繆畱遺將來貞元戊寅歲七月八日白鹿先生記白鹿
先生姓李名渤字濬之時隱廬山因所居洞為號後在
江州刺史諫議大夫給事中桂管觀察使太和元年八
月七日故吏湖口鎮將吳文幹刻石蘇文忠公又反濬
之有說而廣善長之意作石鍾山記曰水經云彭蠡之
口有石鍾山焉酈道元以為下臨深潭微風鼓浪水石
相搏聲如洪鍾是說也人常疑之今以鍾磬置水中雖
大風浪不能鳴也而況石乎至唐李渤始訪其遺踪得
雙石于潭上扣而聆之南聲函胡北音清越枹止響騰
餘韻徐歇自以為得之矣然是說也余尤疑之石之鏗
然有聲者所在皆是也而此獨以鍾名何哉元豐七年
六月丁丑余自齊安舟行適臨汝而長子邁將赴饒之
德興尉送之湖口因得觀所謂石鍾者寺僧使小童持
斧于亂石閒擇其一扣之檉檉焉余固笑而不信也
至莫夜月明獨與邁乘小舟至絕壁下大石側立千仞
如猛獸奇鬼森然欲搏人而山上棲鶻聞人聲亦驚起
磔磔雲霄間又有若老人欬且笑于山谷者或曰此鶴

鶴也余方心動欲還而大聲發于水上噌吰如鍾鼓不
絕舟人大恐徐而察之則山下皆石穴罅不知其深淺
微波入焉涵澹澎湃而為此也舟迴至兩山間將入港
口有大石當中流可坐百人空中而多竅與風水相吞
吐有窾坎鏗鞳之聲與向之噌吰者相應如樂作焉因
笑謂邁曰汝識之乎噌吰者周景王之無射也窾坎鏗
鞳者魏獻子之歌鍾也古之人不余欺也事不目見耳
聞而臆斷其有無可乎酈元之所見殆與余同而言之
不詳士大夫終不肯以小舟夜泊絕壁之下故莫能知
而漁工水師雖知而不能言此世所以不傳也而陋者
乃以斧斤考擊而求之自以為得其實余是以記之蓋
歎酈元之簡而笑李渤之陋也劉氏獻廷廣陽雜記曰
酈道元所謂石鍾山東坡泊舟于此作記者乃上石鍾
也蓋石鍾山有二曰上石鍾下石鍾意善長每遇山水
之靈奇可喜者刻畫若圖畫使人恍置身其間廼石鍾
之佳趣僅傳數語不得坡公之記世人固無有能言之
者廬山之北有石門水水出嶺端有雙石高竦其狀若
門因有石門之目焉水導雙石之中懸流飛澍近三百

許步下散漫千許步上望之連天若曳飛練於霄中矣
 下有磐石可坐數十人冠軍將軍劉敬宣每登陟焉其
 水歷澗逕龍泉精舍南太元中沙門釋慧遠所建也其
 水下入江南嶺卽彭蠡澤西天子鄣也峰磴險峻人跡
 罕及嶺南有大道順山而下有若畫焉傳云匡先生所
 通至江道巖上有宮殿故基者三以次而上最上者極
 於山峰山下又有神廟號曰宮亭廟故彭湖亦有宮亭
 之稱焉余按爾雅云大山曰宮何氏焯曰爾雅以大山
 宮小山爲句道元蓋誤
 一清按爾雅大山宮小山霍疏云宮猶圍繞也謂小山
 在中大山在外圍繞之山形若此者名霍非謂大山名
 宮小山名霍也然卷末禹貢山水澤地所在霍山爲南
 嶽注引爾雅作大山宮小山曰霍則彼文仍是莫謂善

長真誤 宮之爲名蓋起於此不必一由三宮也山廟甚

神能分風擘流住舟遣使行旅之人過必敬祀而後得

去故曹毗詠云分風爲二擘流爲兩昔吳郡太守張公

直自守徵還一清按搜神記云張璞字公直
 不知何許人也爲吳郡太守 道由廬山

子女觀祠婢指女戲妃像人其妻夜夢致聘怖而遽發

明引中流而船不行合船驚懼曰愛一女而合門受禍

也公直不忍遂令妻下女於江其妻布席水上以其亡

兄女代之而船得進公直方知兄女怒妻曰吾何面目

于當世也復下己女於水中將渡遙見二女於岬側傍

有一吏立曰吾廬君主簿敬君之義悉還二女故干寶

書之於感應焉山東有石鏡照水之所出有一圓石懸崖明淨照見人影晨光初散則延曜入石豪細必察故名石鏡焉又有二泉常懸注若白雲帶山廬山記曰白水在黃龍南卽瀑布也水出山腹挂流三四百丈飛湍林表望若懸素注處悉成巨井其深不測其水下入江淵廬山之南有上霄石高壁緬然與霄漢連接秦始皇三十六年嘆斯嶽遠遂記爲上霄焉上霄之南大禹刻石誌其丈尺里數今猶得刻石之號焉湖中有落星石周迴百餘步高五丈上生竹木傳曰有星墜此因以名焉又有孤石介立大湖中周迴一里竦立百丈矗然高峻特爲瓌異上生林木而飛禽罕集言其上有玉膏可采所未詳也耆舊云昔禹治洪水至此刻石紀功或言秦始皇所勒然歲月已久莫能辨之也

水經注釋卷三十九終

